

## HOOFSTUK 5

# MAATSKAPLIKEWERKINTERVENSIE MET BEHULP VAN GESTALTSPELTERAPIE MET DIE ADOLESCENTE LEERDER WAT SPESIFIKE LEERHINDERNISSE ERVAAR

### 5.1 INLEIDING

In hoofstuk twee is 'n teoretiese raamwerk van die gestaltbenadering daargestel, in hoofstuk drie is leerhindernisse bespreek en in hoofstuk vier is 'n uiteensetting gegee van adolessensie as 'n ontwikkelingsfase. In hierdie hoofstuk word aandag gegee aan spel, spelterapie, die doel en waarde van spelterapie, die proses van gestaltspelterapie, die individuele proses van die adolescent binne die gestaltspelterapie proses en spelterapietegnieke wat in besonder van toepassing is op die adolescente leerder met spesifieke leerhindernisse.

Adolessensie is 'n ontwikkelingstadium met unieke uitdagings wat terapie kompleks maak. 'n Groot deel van die probleme wat die adolescent ervaar, sluit konflikte oor identiteit en selfuitdrukking in. Alhoewel die kind se kommunikasievermoë tydens elke nuwe ontwikkelingsfase verder ontwikkel, is die adolescent se vermoë om sy gevoelens te verbaliseer onderontwikkel en moet daar tydens terapie op toepaslike tegnieke gefokus word. (Vergelyk Thompson en Rudolph, 1996:345.)

Die toepaslikheid en waarde van spelterapie en speltegnieke tydens intervensie met die adolescent word vervolgens bespreek.

### 5.2 DIE DOEL EN TAAK VAN MAATSKAPLIKE WERK

Maatskaplike werk het ontwikkel vanuit vrywillige filantropiese handelinge en maatskaplike hervorming as grondslag, tot 'n moderne professie. (Vergelyk Durenfeld, 2006:1.)

Vanuit die verskeie definisies soos bespreek onder paragraaf 1.13.3.1, kan maatskaplike werk kortlik omskryf word as 'n professionele diens wat deur 'n maatskaplike werker gelewer word, wat gerig is op die bevordering van die maatskaplike funksionering van mense. (Vergelyk Die Nuwe Woordeboek vir Maatskaplike Werk, 1995:40; Durenfeld, 2006:1; International Association of Schools of Social Work/International Federation of Social Workers, 2006:1.) Maatskaplike werk het ten **doel** om alle mense in staat te stel om hulle volle potensiaal te ontwikkel, hulle lewens te verryk en om wanfunksionering te voorkom.

Die **taak** van professionele maatskaplike werk is gevvolglik gefokus op probleemoplossing en verandering. Maatskaplike werkers kan dus beskou word as veranderingsagente in die lewens van individue, gesinne en die gemeenskappe wat hulle bedien. Maatskaplike werk is 'n sisteem van interafhanglike **waardes, teorie en praktyk** wat soos volg verder omskryf kan word (International Association of Schools of Social Work/International Federation of Social Workers, 2006:1):

### **Waardes**

Maatskaplike werk is gebaseer op respek vir die gelykheid, waarde en waardigheid van alle mense. Hierdie waardes is vasgevang in die professie se nasionale en internasionale etiese kodes. In Suid-Afrika is dit vervat in die etiese kode van die Raad vir Maatskaplike Diensberoep. (International Association of Schools of Social Work/International Federation of Social Workers, 2006:1)

### **Teorie**

Maatskaplikewerkteorie en -metodologie is gefundeer op kennis verkry vanuit navorsing en praktiese assessering. Dit erken die kompleksiteit van interaksies tussen die mens en sy omgewing en die feit dat die vermoëns van die mens beïnvloed word vanuit die omgewing. Die maatskaplike werk professie maak gebruik van teorieë ten opsigte van menslike ontwikkeling en gedrag en maatskaplike sisteme om komplekse situasies te analyseer en individuele, organisatoriese, maatskaplike en kulturele veranderinge te faciliteer. (International Association of Schools of Social Work/International Federation of Social Workers, 2006:1)

### **Praktyk**

Maatskaplike werkers reageer op krisisse en noedsituasies, maar ook op alledaagse persoonlike en maatskaplike probleme. Die maatskaplike werker maak gebruik van 'n verskeidenheid van vaardighede, tegnieke en aktiwiteite ten einde die holistiese benadering op die mens en sy omgewing te realiseer. (International Association of Schools of Social Work/International Federation of Social Workers, 2006:1)

Maatskaplikewerkintervensie omvat die breë spektrum van primêr persoon-gefokusde psigo-sosiale prosesse, tot die betrokkenheid in maatskaplike beleid, beplanning en ontwikkeling. Spesifieke handeling sluit in, berading, kliniese maatskaplike werk, groepwerk, kinder- en gesinsorg en terapie sowel as pogings om die mens en hulpbronne op mekaar af te stem. Intervensies sluit ook in administrasie, gemeenskapsontwikkeling en gemeenskapsaksies

om maatskaplike- en ekonomiese ontwikkeling en beleid te beïnvloed. (International Association of Schools of Social Work/International Federation of Social Workers, 2006:1)

Ter samevatting word die volgende aanhaling van Direnfeld (2006:2) gegee: "The primary focus of social work practice is on the relationship networks between individuals, their natural support resources, the formal structures in their communities, and the societal norms and expectations that shape these relationships. This relationship-centred focus is a distinguishing feature of the profession."

Die taak van die maatskaplike werker in hierdie studie is dus om met behulp van gestaltpelterapie binne groepe (kennis en vaardighede gebaseer op navorsing en assessering), 'n professionele diens te lewer aan die adolessente leerder met spesifieke leerhindernisse (persoon binne 'n omgewing) ten einde sosio-emosionele funksionering en akademiese prestasie te verbeter. (Vergelyk hoofstuk ses.)

Vervolgens word spel en spelterapie bespreek:

### 5.3 SPEL, DOELWITSPEL EN ONTWIKKELINGSPEL

Ten einde spelterapie as toepaslike intervensiemetode vir die adolessente leerder met spesifieke leerhindernisse te verstaan, is dit eerstens noodsaaklik om te begryp wat spel is, en 'n oorsig te verkry oor ontwikkelingspel en doelwitspel.

#### 5.3.1 DIE KIND EN SPEL

Spel is die belangrikste ervaring vir die kind waardeur hy sin maak uit die wêreld en sy plek in die wêreld vind. Spel is die middel waardeur die kind die wêreld waarin hy lewe begin verstaan. Die kind kommunikeer deur middel van sy spel.

Die belangrikheid en erns van spel word dikwels onderskat. Dit is moontlik omdat die woord aktiwiteite omvat wat nie as werk gedefinieer kan word nie – as volwassenes sien ons kinderaktiwiteite soos spel as minderwaardig. (Vergelyk Cattanach, 1992:29; Smith, 1981:129.) Sowel Oaklander (1988:160-166) as West (1992:11-12) is van mening dat spel die wyse is waarop die kind sy leefwêreld verken en dit is dus noodsaaklik vir sy gesonde ontwikkeling. Oaklander (1988:160-166) stel dit so:

*"...for the child, play is a serious, purposeful business through which he develops mentally, physically and socially. Play is the child's form of self-therapy through which confusions, anxieties and conflicts are often worked through..."*

*Children experience much that they cannot as yet express in language, and so they use play to formulate and assimilate what they experience."*

Spel word beskou as 'n noodsaaklike voorwaarde vir die gesonde groei en ontwikkeling van enige kind. Dit is 'n aktiwiteit waarin hy volkome kan opgaan. Deur te speel, maak hy kennis met mense, voorwerpe en dinge in sy wêreld. Spel is dus die kind se metode van eksplorasie van en dialoog met die mense en dinge in sy leefwêreld. Maar spel is ook 'n wyse waarvolgens hy homself aan ander openbaar. Dit bied aan hom 'n bekende medium wat eie is aan hom en waardeur hy intense gevoelens kan ontlaaai. (Vergelyk Smith, 1981:106.)

Navorser is van mening dat bogenoemde ook waar is ten opsigte van die adolesente leerder met spesifieke leerhindernisse. Die vorme van spel en wyse waardeur hy sin uit sy wêreld maak, verskil net van die kind. Die adolescent is kundig daarin om weg te skram van emosionele pyn en om sake verwant aan die pyn te vermy. In 'n interventionsprogram vir die adolesente leerder met spesifieke leerhindernisse moet daar gefokus word daarop om verhoogde bewustheid en trauma-dinamika elemente na die bewuste te bring. (Vergelyk Geldard & Geldard, 2002:100.)

Die feit dat spel nie net vir kinders belangrik is nie, maar ook vir adolesente en volwassenes, word soos volg in Cattanach (1992:30) gestel: *"However, play is of vital importance as a way in which we learn to value ourselves. Through playing we can imagine other possibilities and ways of being. These imaginings develop our capacity to be creative."* Cattanach (1992:30) haal Jung aan: *"The creative activity of imagination frees man from his bondage... and raises him to the status of one who plays... man is completely human only when he is at play."*

Smith (1987:129), van die eerste outeurs in Suid-Afrika wat spesifiek oor die benutting van spel tydens maatskaplikewerkintervensie geskryf het, onderskei tussen doelwit spel en ontwikkelingspel as terapeutiese waardes van spel.

### 5.3.2 DOELWITSPEL

Doelwit spel beteken die doelbewuste aanwending, herfokusering en rig van spel met 'n duidelike en spesifieke doel (Smith, 1987:130). Dit is dus gerigte spel vir interventionsdoeleindes (Webb, 1999:32). Doelwit spel is ingestel op die bereiking van baie spesifieke lewensdoelstellings, dit wil sê doelstellings wat die adolescent uiteindelik moet bereik om as volwasse en verantwoordelike mens te funksioneer. Die toepaslikheid en

funksonele waarde van spel lê volgens Smith (1987:130) veral op die liggaamlike, psigiese, interpersoonlike, sosio-kulturele, selfbeeld en geestelike terreine. Holisme word dus beklemtoon. (Vergelyk paragraaf 2.5.1.) Sekere spelvorme wat by die ontwikkelingsfase en geslag van die adolescent pas, word doelbewus in terapie aangewend. (Vergelyk ook West, 1992:11-12; Oaklander, 1988:160-166; Van der Merwe, 1996e:11.) Spelvorme toepaslik vir die adolescent is gebruik in hierdie studie met die oog op die trauma-dinamika en selfbeeld, of sin vir self, van die individuele adolescent. Dit is dus spel wat gebruik is met 'n spesifieke doel – om die adolescent leerder met spesifieke leerhindernisse te bemagtig en die verhoging van akademiese prestasie te bewerkstellig.

### 5.3.3 ONTWIKKELINGSPEL

Spel moet ook vanuit 'n ontwikkelingsperspektief benader word. Dit stel die maatskaplike werker in staat om min of meer 'n bepaling van die ontwikkelingsvlak van die adolescent te maak. Kenmerke van spel gedurende die onderskeie ontwikkelingsfasies van die kind word deur Smith (1987:130) beskryf. Gedurende adolesensie gaan dit veral om rollespel, dit wil sê om die rol van iemand anders (identifikasiefiguur) in te neem en te speel. Dié rolle wat hy uittoets is veral sosiale rolle, byvoorbeeld die rol van 'n meisie of seun. In die rollespel handel dit oor houdings en volwasse rolle wat as voorbereiding vir die volwasse wêreld dien. Tydens die fase speel die portuurgroep 'n beduidende rol. Hier leer hy om saam te werk, te volg, te lei, te konformeer of nie, en te kommunikeer. Verder hou hy daarvan om te eksperimenteer. Die eksperimentering is meestal in sy fantasiewêreld. Hy ontvlug gereeld na die wêreld om lewensituasies en –probleme, soos om moeilik beheerbare geslagsdrang te probeer hanteer op 'n aanvaarbare wyse.

## 5.4 DIE DOEL EN WAARDE VAN SPEL AS TERAPEUTIESE MEDIUM IN MAATSKAPLIKEWERKINTERVENTIE MET DIE ADOLESSENTE LEERDER MET SPESifieKE LEERHINDERNISSE

Waar die adolescent by terapie betrek word, moet sy besondere ontwikkelingskenmerke volgens navorser, te alle tye in ag geneem word. Dit is die terapeut se verantwoordelikheid om na die kind se kommunikasievlek te beweeg deur 'n medium te gebruik waarmee beide gemaklik voel. Thompson en Rudolph (1996:345) en Van der Merwe (1996e:7) wys daarop dat spel die adolescent se beperkte vermoë om sy gevoelens en gedagtes te verbaliseer, oorbrug.

Vervolgens word die doel en waarde van spel as toepaslike terapeutiese medium in intervensie met die adolescent bespreek.

Volgens Axline (1989:8,14) kan die kind deur emosies uit te speel, dit na die oppervlak bring waar hy dit kan ervaar en erken en kan leer om dit op 'n positiewe manier te hanteer. Geldard en Geldard (1999:2) is van mening dat 'n kombinasie van verbale berading en die gebruik van ander media vir die kind 'n omgewing skep waar terapeutiese verandering moontlik is. Dit is ongetwyfeld ook van toepassing op die adolescent.

Die feit dat spel effektief gebruik kan word ten opsigte van terapie met die adolescent, blyk uit die volgende belangrike raakpunte:

#### 5.4.1 SPELTERAPIE AS TOEPASLIKE INTERVENSIEMETODE

Guerney (1983:419) stel dat daar 'n behoefte is aan direkte intervensie ten opsigte van sekondêre gevolge van spesifieke leerhindernisse. Sekondêre gevolge van leerhindernisse is in hoofstuk drie bespreek. Spelterapie blyk 'n toepaslike intervensiemetode te wees aangesien dit 'n positiewe groeiervaring aan die adolescent bied in die teenwoordigheid van 'n ondersteunende volwassene. Sodoende word die adolescent in staat gestel om innerlike kragte te ontdek wat andersins in die alledaagse realiteite nie moontlik is nie. Jennings (1993:52) sluit hierby aan wanneer sy stel: "*However damaged the child - one reason for the playtherapy is to assist the child discover healing metaphors to facilitate the process of repair.*"

##### 5.4.1.1 DEFINISIE VAN SPELTERAPIE

Die Raad van Direkteure van die Internasionale Vereniging vir Spelterapie het in 1997 die volgende definisie saamgestel: "*Play Therapy is the systematic use of a theoretical model to establish an interpersonal process wherein trained play therapists use the therapeutic powers of play to help clients prevent or resolve psychosocial difficulties and achieve optimal growth and development.*" (O'Connor, 2000:7).

Spelterapie is die kind se geleentheid om groei onder die mees positiewe omstandighede te beleef en met nuwe gedrag te eksperimenteer.

Volgens Webb (1999:30) is spelterapie 'n hulpinteraksie tussen 'n opgeleide volwassene en 'n kind wat poog om die kind se emosionele nood te verlig deur die simboliese kommunikasie van spel. Die terapeut help om kliniese simptome te verlig en werk na die verwydering van stremminge vir die kind se verdere ontwikkeling, sodat die vooruitsig vir die kind se toekoms groei bevorder. West (1996:15) stel dit duidelik dat spelterapie die adolescent se gevoelens en nie net sy gedrag betrek nie. Spelterapie is dus die mees

gepaste terapie vir die adolescentleerder met spesifieke leerhindernisse aangesien dit fokus op die onuitgesproke en dikwels onbewuste gevoelens wat ervaar word.

Ter aansluiting hierby kan gelet word op die doelstellings en gepaardgaande vaardighede wat volgens Smith (1991:132) tydens spelterapie bemeester kan word soos uiteengesit in tabel 5.1:

**TABEL 5.1: SPESIFIKE DOELSTELLINGS EN DIE ONTWIKKELING VAN GEPAARDGAANDE VAARDIGHED TYDENS SPELTERAPIE**

DOELSTELLINGS	VAARDIGHED
1. Die identifisering en openbaring van eie gevoelens	Om eie gevoelens te identifiseer en te ken. Om gevoelens as eie te aanvaar. Om aan gevoelens uiting te gee. Om eie gevoelens te beheer.
2. Die bemeester van lewensituasies	Om lewensituasies objektief waar te neem. Om eie aandeel te erken. Om alternatiewe oplossings te oorweeg. Om konsekwensies van optredes te antisipeer.
3. Die neem van verantwoordelike besluite	Om 'n keuse tussen alternatiewe te maak. Om verantwoordelike besluite te neem. Om besluite deur te voer. Om verantwoordelikheid vir besluite te neem.
4. Die bevordering van fisiese en seksuele groei.	Om gereeld liggaamlike aktiwiteite te beoefen. Om gepaste geslagsrolgedrag te openbaar. Om selfbeheersing ten opsigte van seksualiteit toe te pas.
5. Die stimulering van skeppende en kritiese denke en aktiwiteite.	Om nuut en oorspronklik te dink. Om 'n reeks van oplossings vir 'n probleem te genereer. Om konsekwensies te antisipeer. Om vraagstukke krities te bekou.
6. Die ontwikkeling van 'n gesonde selfbeeld en identiteit.	Om sigself met vermoëns en gebreke te aanvaar. Om vertroue in eie vermoëns te hê. Om 'n eie identiteit en geslagsidentiteit te aanvaar. Om tot eerlike selfopenbaring bereid te wees.
7. Die skep van 'n kommunikatiewe verhouding met die medemens.	Om vertroue in ander mense te stel. Om liefde en empatie te betoon. Om betekenisvol met ander te kommunikeer.

	Om tot diens van ander te wees.
8. Die skep van 'n vertrouensverhouding met ouers.	Om 'n emosionele binding met ouers te maak. Om ouerlike gesag te aanvaar. Om ouers te vertrou. Om 'n openheid teenoor ouers te toon.
9. Die ontwikkeling van 'n samewerkende verhouding met portuurs.	Om saam met maats te werk en te speel. Om lojaal teenoor portuurgroep te wees. Om onderskeidelik te lei en te volg. Om maats te aanvaar.
10. Die bevordering van liefde en waardering vir die natuur.	Om die natuur te waardeer. Om die natuur te bewaar. Om natuurlike hulpbronne te ontwikkel. Om vrye tyd gesond te bestee.
11. Die aktiewe inskakeling by die omgewing en gemeenskap	Om 'n arbeidsroeping te ervaar. Om aktief by die gemeenskaps- en kultuurlewe betrokke te wees. Om 'n sosiale verantwoordelikheid te hê. Om 'n burgerlike verantwoordelikheid te hê.
12. Die aanleer van Christelike lewenswaardes en norme.	Om 'n lewensroeping en – ideaal te hê. Om na reg, geregtigheid en vrede te strewe. Om die waarheid na te streef. Om die Christelike geloof uit te leef.

(Smith. 1991: 132)

#### 5.4.1.2 SPELTERAPIE IN DIE SKOOLOPSET

Case en Dalley (1992:11) beklemtoon die feit dat daar 'n besliste verband tussen akademiese prestasie en emosionele probleme bestaan en verwys na die behoefte aan kreatiewe terapie of berading in skole. Case en Dalley (1992:11) verwys na die belangrikheid van terapie of berading in skole in 'n poging om kinders by te staan om op 'n toepaslike ontwikkelingsvlak te funksioneer. In Amerika bestaan daar sedert 1981 integrasie tussen hoofstroom onderwys en kinders met spesiale behoeftes en/of leerhindernisse. Dit kan vergelyk word met die inklusiewe onderwyssstelsel in Suid-Afrika. In die lig van hierdie ontwikkeling is hierdie studie dus baie toepaslik.

Blos in Linesch (1988:5) toon herhaaldelik die belangrikheid van fantasie en kreatiwiteit as tegnieke waardeur die adolescent persoonlike ervaringe kan kommunikeer. Sy stel dit soos volg:

*"The heightened introspection or psychological closeness to internal processes in conjunction with a distance from outer objects allow the adolescent a freedom of experience and an access to his feelings which promote a state of delicate sensitivity and perceptiveness. The creative productivity thus represents an effort to accomplish urgent tasks of internal transformations (Linesch, 1988:5)."*

Malmquist en Blos (in Linesch, 1988:5) stem saam dat die rol wat kreatiwiteit in die bereiking van ontwikkelingstake by die kind speel van uiterste belang is. Malmquist (in Linesch, 1988:5) wys daarop dat misverstande dikwels ontstaan omdat tipiese ontwikkelingskonflikte van adolessensie gesien word as tekens van afwyking of abnormaliteite. Hy wys verder op die terapeutiese waarde daarvan om te verstaan dat die adolescent se kriptiese leidrade gesien moet word as pogings om die intra-psigiese worstelings te bemeester.

Navorser ervaar dat sommige ouers en onderwysers dikwels onkundig ten opsigte van die normale sosio-emosionele konflikte en tiperende gedrag van die adolescent openbaar en nie insig toon in die verskillende grade van tiperende gedrag wat voorkom by adolessente tydens normale konflikte nie. Juis as gevolg van hierdie gebrek aan begrip word die adolessente leerder met spesifieke leerhindernisse dikwels uitgewys as anders, wat vir hom in hierdie ontwikkelingsfase totaal onaanvaarbaar is as gevolg van die behoefte aan konformering aan die groep. Daar is die neiging om die geringste 'andersheid' as 'n abnormaliteit af te maak, wat dan die probleem vererger (Thom et al., 1998:440).

Dit is dus duidelik dat kreatiwiteit en selfuitdrukking, as uitlaatkleppe, belangrike hulpmiddels vir die adolescent is in die bereiking van die moeilike ontwikkelingstake van adolessensie soos in hoofstuk vier bespreek.

Guerney (1983:432) is ten gunste van spelterapie in 'n skoolopset met die doel om te fokus op onvoldoende ontwikkeling en leer as gevolg van 'n gebrek aan voldoende sensoriese vaardighede en neurologiese defekte. Sy stel voor dat dit meer dikwels ingesluit word in die terapie aan kinders met leerhindernisse en beveel ook verdere navorsing aan ten einde vas te stel watter soort terapie die mees toepaslike is vir die onderskeie soorte leerhindernisse. Guerney (1983:433) is verder van mening dat spelterapie groter moontlikhede het en 'n wyer impak op sommige primêre manifestasies van neurologiese uitvalle soos enkoderingsprobleme mag hê, as wat huidiglik deur publikasies weerspieël word omdat

navorser eerder verslag lewer oor die impak van terapie op sekondêre gedrag byvoorbeeld aggressie, eerder as op die neurologiese uitvalle.

#### 5.4.1.3 SPELTERAPIE AS KOMMUNIKASIEMIDDEL MET DIE ADOLESSENT

Effektiewe terapeute, nieteenstaande hul psigologiese oriëntasie, moet oor die vermoë beskik om aan te sluit by hul kliënt se innerlike wêreld, indien hulle groei binne die kliënt se psigiese strukture wil bewerkstellig (Webb, 1996:16). Verder moet die taal wat deur die terapeut gebruik word oor 'n subtiliteit beskik sodat die kliënt die pas en diepte kan hanteer en met nuwe psigiese materiaal kan integreer. Andersins mag die kliënt oorweldig of 'onderweldig' voel en gevvolglik vrees ervaar wat insig en positiewe verandering mag strem. (Vergelyk Linesch, 1988:iii.)

Hierdie uitdaging om 'n wedersydse verstaanbare en toepaslike taal vir terapie te vind, is besonder toepaslik wanneer daar met kinders of adolesente gewerk word (Linesch, 1988:iii).

Formele taal om emosies te omskryf, mag moontlik nie genoegsaam by die adolescent ontwikkel wees nie, of indien die terapeut formele taal gebruik, kan dit die terapeutiese verhouding benadeel aangesien die adolescent formele taal met die volwasse of ouoritatiewe wêreld assosieer. Simboliese spel (wat dikwels effektief is met die kind), aan die anderkant, mag hoogs waarskynlik deur die adolescent verwerp word as te kinderagtig en gevvolglik as te bedreigend beskou word. Linesch (1988:iv) is van mening dat veral skeppende kuns 'n bevredigende medium verskaf waardeur die adolescent sy gevoelens kan kommunikeer. West (1996:15) is van mening: "*Play therapy is a holistic approach, using play as a means of 'helping' in a non-invasive way, the physical, spiritual, emotional and cognitive aspects, both conscious and unconscious taking in account the past, present and future of the 'whole' child.*"

Verskeie skrywers is dit egter eens dat spel as simboliese taal, kommunikasie fasiliteer en tot katarsis van gevoelens by die kind lei. (Vergelyk Van der Merwe, 1996e:7; Landreth, 1991:10; Jennings, 1993:52.) Kinders kan hulself makliker, meer volledig en effektief deur spel uitdruk as deur verbale kommunikasie. Navorser is van mening dat hierdie feit nie net van toepassing op kinders is nie, maar ook belangrik selfs ten opsigte van die adolescent en volwassene is. Webb (1999:32) sien dan ook die doel van spelterapie om die adolescent te help om konflikte en angs uit te druk deur 'n spelmedium in die konteks van 'n terapeutiese verhouding.

Die adolescent kry dus die geleentheid om deur middel van 'n speltegniek te kommunikeer. (Vergelyk paragraaf 5.6.4.)

#### **5.4.1.4 SPELTERAPIE AS HULPMIDDEL IN DIE BEWUSWORDING VAN EMOSIES**

Emosionele konflikte wat deur die adolescent ervaar word, kan beskikbaar gemaak word vir verkenning deur middel van die skepping van kunswerke (Linesch, 1988:ix). Case en Dalley (1992:8) is ook van mening dat die proses van kuns dit vir die adolescent makliker maak om spontaan te kommunikeer. Case en Dalley (1992:9) is verder van mening dat emosionele en gedragsprobleme gewoonlik met mekaar verband hou en dat beide aspekte aandag moet geniet gedurende spelterapie. Kuns kan gebruik word as 'n veilige metode waardeur sterk gevoelens en emosies of '*unfinished business*' na die bewuste gebring word en dan aandag geniet. Dit is juis die emosionele aspekte soos woede, hulpeloosheid, isolasie, teleurstelling, angstigheid, verwerping en moedeloosheid wat kenmerkend is van die adolescentse leerder met spesifieke leerhindernisse. (Vergelyk parrawe 6.3.3; 7.3.4.3.)

#### **5.4.1.5 DIE GEBRUIK VAN SPELTERAPIE OM DIE UITDrukking VAN EMOSIES AAN TE MOEDIG**

Die gebruik van visuele materiaal om die uitdrukking van emosies aan te moedig, dra by tot die effektiwiteit van die terapeutiese proses. Visuele beelde, skeppinge en metafore kan die gaping wat tussen spelterapie en verbale terapie bestaan, oorbrug (Oaklander, 1988:74; Linesch, 1988:iv). Die adolescent kan sodoende geleentheid gebied word om sy emosies op die skepping te projekteer, wat dan die maatskaplike werker geleentheid bied om bewustheid te bewerkstellig en die uitdrukking van emosies kan aanmoedig. Volgens Linesch (1988:iv) het 'kuns' noemenswaardige potensiaal in terapie in die algemeen en veral spesifiek met adolescentse. Linesch (1988:iv) is verder van mening dat die analisering van sekere beelde soos drome in terapie selfs maande later tot die skielike verheldering van konflik kan lei. Op dieselfde wyse kan beelde vanuit die kinderjare of selfs onlangse interpersoonlike ervaringe bydra tot die verheldering van '*unfinished business*'. Sodanige beelde kan moontlik alles op een oomblik verhelder of jare van ervaring in 'n verstaanbare patroon vervat (Linesch, 1988:iv; Geldard & Geldard, 1999:60; Steiner & Perry, 1999:36.).

In 'n maatskaplikewerkintervensieprogram kan die adolescentse leerder met spesifieke leerhindernisse dus geleentheid gebied word om deur middel van verskeie tegnieke op 'n simboliese wyse kontak te maak met voorgrondbehoeftes sodat dit aangespreek kan word.

#### 5.4.1.6 SPELTERAPIE BIED 'N VEILIGE OMGEWING TOT DIE UITDRUKKING VAN EKSTREME VORME VAN GEDRAG

Adolessente vind dit moeilik om hul onbewuste of gedeeltelik bewuste wêreld voor te stel, te verdedig, te begryp en te integreer (Linesch, 1988:iv). Navorser is van mening dat dit so is omdat die adolessent se vermoë tot abstrakte denke nog nie ten volle ontwikkel het nie. Verder bestaan daar 'n besliste verhouding tussen emosionele welstand en selfuitdrukking in adolessensie. Case en Dalley (1992:11) en White en Allers (1994:5) stel dat dit dikwels gebeur dat ongelukkigheid en kwesbaarheid in ekstreme vorme van gedrag soos woede uitbarstings, uitreagerende gedrag en ander gedrag soos eetsteurnisse en drank- of dwelmmisbruik uitdrukking vind. Emosies word as intens ervaar en uitgedruk, maar is dikwels moeilik om te beheer. Dit maak dit noodsaklik vir die spelterapeut om te hou by duidelike grense tydens spelterapie en 'n indiepte begrip van die kompleksiteit van die probleme van die adolessente leerder met spesifieke leerhindernisse. Kaduson *et al.* (1997:211) stel dit so:

*"They receive mixed messages in the real world when their inappropriate, unthinking acts result in blame for 'intentional' actions. They commonly feel tremendous remorse. In play, however, they can release true feelings and experience true emotions in a safe environment... they gain a sense of mastery over a world that they tend to experience passively in real life."*

Spelterapie bied 'n veilige omgewing waar die adolessente leerder met spesifieke leerhindernisse hierdie emosies kan uitspeel en tot insig kom in plaas daarvan om dit te onderdruk.

#### 5.4.1.7 SPELTERAPIE STIMULEER DIE REGTER BREINHEMISFEER

Die frase dat "n prent 'n duisend woorde werd is", is gebaseer op die feit dat die brein se serebrale hemisfere, inligting op verskillende wyses prosesseer. Die mening word tans gehuldig dat die regter breinhemisfeer volgens 'n holistiese eenheid of 'gestalt', inligting in groot hoeveelhede kan absorbeer en selfs inligting wat logies teenstellend is en alles gelykydig kan saamvoeg en as 'n '*mental*' beeld kan vertoon. Dit is in teenstelling met die linkerhemisfeer wat inligting op 'n spesifieke opeenvolgende liniére wyse inneem en 'n logiese filter gebruik om te bepaal wat realisties en gepas is. (Vergelyk Bender & Ferreira, 1994:210-211.) Omdat baie inligting wat tydens terapie verwerk moet word uit teenstellings en konflikte of polariteite bestaan, speel die regter breinhemisfeer en sy holistiese beeldvorming 'n baie belangriker rol (Linesch, 1988:iv). Daarom is dit moontlik dat 'n visuele beeld ervaringe kan bevat soos: "Ek is lief vir my moeder/Ek haat my moeder" of: "Ek is

bang/opgewonde om na die nuwe skool te gaan", terwyl die logiese woord opvolging van die linker breinhemisfeer moeilik die teenstrydende emosies kan bevat. Kaduson (1997:211) bevestig hierdie feit en stel dit soos volg:

*"It is through play, the language of the child, that children can express their thoughts and feelings. Because it is nonverbal, the language is quite different from verbal language. A more fantastic, drive-dominated form of communication, play is full of images and emotions. Unlike the logical, sequential, and analytical thoughts expressed by words, apparently left-brain centered, it seems more right-brain orientated. Perhaps it is for this reason that play enables ADHD children to communicate thoughts and feelings that they are aware of but cannot express in words."*

Navorser is van mening dat die adoleessente leerder met spesifieke leerhindernisse dus ook besonder baat sal vind by gestaltpelterapie deur die uitdrukking van gevoelens wat hy nie andersins sou kon doen nie. Gestaltpelterapie wat veral op polariteit, fantasie en onlogiese inhoud fokus, stimuleer dus grootliks die regter breinhemisfeer van die adoleessente leerder met spesifieke leerhindernisse.

#### **5.4.1.8 SPELTERAPIE BIED AAN DIE ADOLESENT DIE GELEENTHEID OM SY PERSEPSIE VAN DIE WERKLICHEDUIT TE SPEEL**

Deur aan die adoleessent met spesifieke leerhindernisse die geleentheid te bied om sy persepsie van die werklikheid deur middel van spelterapie uit te speel of te eksternaliseer, (projekteer) kan hy volgens navorser begelei word tot groter bewustheid en beheer oor sy situasie en die hantering van emosies wat hiermee gepaardgaan. Deur die gebruik van spelterapie kan die adoleessent se groei na optimale hantering van die leerhindernisse versterk word en die aanpassing by die leerhindernisse vergemaklik word omdat probleme wat manifesteer, aangespreek word (White & Allers, 1994:6; Yontef, 1993:142). Kaduson *et al.* (1997:209) verbind hierdie projeksie aan die kind se fokus op die proses van spel eerder as op die uitkoms: "...the child is more concerned about the play activity itself than the outcome or successful completion of the activity. During this play, the child is open to learn, to problem solve, to experience." Die adoleessente leerder met spesifieke leerhindernisse raak so betrokke by die proses van projeksie en geniet die aktiwiteit sonder om bekommerd te wees oor die voltooiing daarvan. Navorser is van mening dat dit besonder belangrik is dat die adoleessente leerder met spesifieke leerhindernisse geleentheid gebied moet word om op so 'n spontane wyse sy realiteit uit te speel en te hanteer aangesien hy andersins altyd moet fokus op die voltooiing van aktiwiteite.

Vanuit bogenoemde kan die afleiding gemaak word dat die beginsels en metode van gestaltpelterapie in besonder 'n positiewe bydrae kan lewer tot terapie by die adolescent leerder met spesifieke leerhindernisse.

Vervolgens word die proses van hulpverlening en gestaltpelterapie met die adolescent met spesifieke leerhindernisse bespreek.

### 5.5 DIE HULPVERLENINGSPROSES AAN DIE ADOLESENT


Die verskillende prosesse en fases binne die hulpverleningsproses aan die adolescent word vervolgens bespreek.

Verskeie skrywers is dit eens dat hulpverlening aan die kind of adolescent, proses georiënteerd is. (Vergelyk Oaklander, 1994a:147; Geldard & Geldard, 1999:45-52; O'Connor, 1994:143.) Dit is belangrik om te begryp dat binne die wyer raamwerk van maatskaplikewerkhulpverlening, die terapeut ook binne die gestaltpelterapeutiese proses aandag aan die adolescent se individuele proses moet gee en dit voortdurend moet assesseer in terme van kontak en bewustheid.

Navorser sien die prosesse van maatskaplikewerk hulpverlening, gestaltpelterapie en individuele proses van die adolescent leerder met spesifieke leerhindernisse soos drie ratte in 'n masjien. Wanneer een beweeg veroorsaak dit dat die ander saam beweeg. Die een kan ook nie sonder die ander beweeg nie. Die kepe van die ratte pas inmekaar soos die hulpverlening-, gestaltpelterapie- en die individuele proses van die adolescent saam beweeg.

Hierdie prosesse word in figuur 5.1 voorgestel.

**FIGUUR 5.1: DRIE PROSESSE VIND GELYKTYDIG PLAAS**



### 5.5.1 AANVANGSFASE VIR MAATSKAPLIKEWERKINTERVENTIE

In hierdie fase kom die adolescent op verskeie wyses onder die maatskaplike werker se aandag – op grond van 'n besluit deur die ouers/versorgers of verwysing deur die skool, geneesheer, ander instansie, of soms ook die adolescent self. (Vergelyk Geldard & Geldard, 1999:37; Oaklander, 1988:181-183.) Teen die tyd dat verwysing plaasvind, het die probleemsituasie dikwels reeds 'n sensitiewe, onuithoudbare punt bereik omdat ouers gewoonlik huiwerig is om 'n terapeut te kontak. Geldard en Geldard (1999:36) beskryf hierdie as die '*Initial assessment phase.*'

#### 5.5.1.1 AANMELDING EN AARD VAN DIE AANMELDINGSPROBLEEM

Die eerste aanmelding word gewoonlik telefonies deur die ouers gedoen en hulle behoort reeds voorberei te word daarop dat hulle die probleem tydens die eerste onderhoud in die teenwoordigheid van die adolescent moet omskryf (Oaklander, 1988:185). Navorser verkieks om adolescent en ouers saam te sien vir die eerste onderhoud sodat onderskeie verwagtinge van die adolescent, ouers en terapeut openlik bespreek kan word en dat terapie van dieselfde vertrekpunt begin kan word. (Vergelyk Oaklander, 1988:185.) Dit is ook reeds hier waar die verhouding met die adolescent begin wanneer hy sal ervaar dat die terapeut hom as mens in eie reg aanvaar en openlik is met alle partye.

Navorser verkieks om slegs basiese agtergrondsinligting tydens die aanmelding te verkry om sodoende moontlike vooroordeel by die terapeut te voorkom. (Vergelyk Oaklander, 1988:184; Landreth, 1991:132-133.) Inligting oor die aard van die probleem en hoe en wanneer dit manifesteer, inligting oor die adolescent se ouderdom, asook sy noemnaam, kan verkry word om as aanknopingspunt te dien by die eerste ontmoetingsessie met die adolescent. Respondente betrokke by hierdie studie is deur die skool of ouers by die kantoor van Kindersorg Suid-Afrika: Mpumalanga aangemeld en ook slegs basiese agtergrondsinligting is aanvanklik verkry.

#### 5.5.1.2 KENNISMAKING EN EERSTE SESSIE

Die kennismaking en eerste sessie met die adolescent en sy ouers vorm die grondslag vir die verdere verloop van die hulpverleningsproses. Die eerste onderhoud kan vir beide ouers en adolescent baie onseker en ongemaklik wees. Die adolescent is gewoonlik onbekend met die terapeutiese situasie en kan vrese en vrae ervaar, onder meer oor hoekom hy na die terapeut gebring word, of hy gestraf sal word, of iets met hom verkeerd is, of sy ouers hom steeds lief het, of sy vriende gaan uitvind en hom spot. (Vergelyk Thompson & Rudolph, 2000:32). Navorser is van mening dat die adolescent as gevolg van

sy ontwikkelingsfase, veral sensitief is ten opsigte van wat sy maats sal dink. (Vergelyk paragraaf 4.3.4.2.)

Navorser is van mening dat die teenoorgestelde egter ook waar mag wees in die geval van die adolescent met leerhindernisse. As gevolg van die leerhindernisse mag dit wees dat die adolescent al herhaalde terapie ontvang het by 'n verskeidenheid van terapeute, onder andere arbeidsterapeute, remediërende terapeute, opvoedkundige sielkundiges of spraakterapeute. Dit mag meebring dat die adolescent voel dat hy al oorbekend is met die terapeutiese situasie en dat hy net weereens blootgestel word aan 'n volwassene wat dink daar is fout met hom. Die adolescentleerder met spesifieke leerhindernisse is baie sensitief en oorbewus dat hy anders is as sy maats. (Vergelyk paragraaf 7.3.3.)

Die maatskaplike werker as terapeut se optrede, nie-verbale gedrag en kleredrag tydens die ontmoeting en eerste sessie behoort aan die adolescent opregtheid en vriendelikheid te weerspieël. Aspekte soos stemtoon, gesigsuitdrukking, oogkontak en houding is belangrik. Daar moet gewaak word daarteen om **met** die ouer **oor** die adolescent te praat (Landreth, 1991:156). Ysbrekers, byvoorbeeld om te praat oor sy skool of sport, kan gebruik word om die adolescent te betrek en op sy gemak te laat voel. Speltegnieke soos 'n genogram en ekokaart kan benut word om verdere inligting in te samel.

Die optrede van die maatskaplike werker as terapeut moet aan die adolescent onvoorwaardelike aanvaarding oordra wat 'n belangrike deel vorm van die ek-jy-verhouding. (Vergelyk Geldard & Geldard, 1997:39; Oaklander, 1988:185,186.)

Na die kontakfase word daar oorgegaan tot kontraksluiting tussen die onderskeie partye.

### 5.5.2.3 KONTRAKSLUITING

Kontraksluiting bied die geleentheid om vanaf die aanvang van terapie doelstellings, take en kriteria vir vordering vas te lê en onderlinge verwagtinge uit te klaar.

Verskeie aspekte behoort tydens die kontraksluiting aandag te geniet:

Logistieke reëlings (West, 1996:47), die vertroulikheidsaspek (Guerney, 1983:46), die stel van grense. Grense verskaf aan die adolescent 'n gevoel van veiligheid waarbinne hy kan waag en keuses uitoefen en verskaf die riglyne vir die welstand van die terapeut en die adolescent tydens terapie (Landreth, 1991:212-220; McMahon, 1992:67). Assessering waarvolgens die effektiwiteit van intervensie gemeet word, is 'n voortdurende proses en

begin reeds in die kontrakfase. Ouers behoort ook daarop voorberei te word dat die adolescent se gedrag aanvanklik agteruitgang mag toon. (Vergelyk Geldard & Geldard, 1997:43; Jennings, 1993:128; West, 1996:47.)

Tydens hierdie studie het kontraksluiting ook bestaan uit verduideliking van bogenoemde aspekte en die teken van die ooreenkoms tussen die terapeut en die ouers en die terapeut en die adolescent wat betrek is by die studie. (Bylae 1.)

## 5.6 DIE GESTALTSPELTERAPIEPROSES

Die spelterapieproses, en in die geval van hierdie navorsing, die gestaltspelterapieproses, vorm die raamwerk en werkswyse waarbinne die maatskaplike werker hulp verleen aan die adolescent leerder met spesifieke leerhindernisse. (Vergelyk paragraaf 6.3.) Dit is nie 'n liniére proses nie, maar die verloop is eerder spiraalvormig. (Vergelyk Compton & Galaway, 1984:313; Egan, 1994:40; Geldard & Geldard, 1997:46.) Orton (1997:xvi) sien die terapeutiese proses as die fasilitering van verandering in gedagtes, gevoelens en gedrag by die adolescent, deur die terapeut. Die volgende tabel duif die verskillende fases van die gestaltspelterapieproses sowel as die aspekte wat tydens elke fase hanteer moet word, aan (Blom, 2006:23-238):

**TABEL 5.2: GESTALTSPELTERAPIEPROSES**

FASE IN DIE TERAPEUTIESE PROSES	ASPEKTE WAT AANGESPREEK MOET WORD
Totstandkoming van die terapeutiese verhouding, assessorering en behandelingsplan.	<ul style="list-style-type: none"> <li>• Vestig die ek-jy-verhouding.</li> <li>• Fokus op die hier-en-nou.</li> <li>• Verantwoordelikheid van die terapeut en die kind.</li> <li>• Tegnieke en aktiwiteite wat op ervaring en ontdekking fokus.</li> <li>• Manifestasie en hantering van weerstand.</li> <li>• Stel van grense.</li> <li>• Assessering van die kind volgens die holistiese gestalt assessorings kriteria.</li> <li>• Stel 'n behandelingsplan op met verwysing na die doelstellings van gestaltspelterapie.</li> </ul>
Kontak en die bevordering van selfondersteuning.	<ul style="list-style-type: none"> <li>• Sensoriese kontak.</li> <li>• Liggaamskontak.</li> <li>• Versterking van die self deur:</li> </ul>

	<ul style="list-style-type: none"> <li>• Definiëring van die self;</li> <li>• Keuses;</li> <li>• Beheer;</li> <li>• Besit van projeksies;</li> <li>• Grense;</li> <li>• Pret, verbeelding en humor.</li> </ul>
Uitdrukking van emosies.	<ul style="list-style-type: none"> <li>• Uitdrukking van aggressiewe energie.</li> <li>• Uitdrukking van emosies deur:             <ul style="list-style-type: none"> <li>• Kognitiewe gesprekke oor emosies;</li> <li>• Gesprekke oor die liggaam se reaksie op verskillende emosies;</li> <li>• Projektering van en besitname van emosies;</li> <li>• Aanleer van hanteringstrategieë en – vaardighede ten opsigte van emosies.</li> </ul> </li> </ul>
Selfvertoeteling.	<ul style="list-style-type: none"> <li>• Kontakmaking met die onaanvaarbare deel van die self.</li> <li>• Aanleer van vaardighede om die vertoetelde deel aan te wend om onaanvaarbare dele te vertoetel en te integreer.</li> <li>• Aanleer van vaardighede om die self te vertoetel.</li> </ul>
Hantering van die hardnekkige onvanpaste proses.	<ul style="list-style-type: none"> <li>• Bevorder bewustheid van die eie proses en gedrag.</li> <li>• Ontwikkel vaardighede om keuses te maak en verantwoordelikheid te neem.</li> <li>• Ontwikkel hanteringstrategieë vir probleme.</li> </ul>
Terminering.	<ul style="list-style-type: none"> <li>• Deeglike evaluering om gepaste tyd te bepaal.</li> <li>• Deeglike voorbereiding.</li> </ul>

(Blom, 2006:237-238.)

Vervolgens word die gestaltpelterapieproses met die adolessente leerder met spesifieke leerhindernisse beskryf. Dit word gedoen na aanleiding van Geldard en Geldard (1999:36) se fase twee '*Therapy for the child*'.

### 5.6.1 DIE EK-JY ('I/THOU') VERHOUDING

Volgens Oaklander (1993:281, 282) word die terapeutiese verhouding as 'n ek-jy ('I/Thou') verhouding beskryf. Die ek-jy-verhouding impliseer dat terapeut en adolescent op 'n

gelyke vlak is ongeag ouderdom of kwalifikasie. Dit impliseer verder dat die adolescent gemaklik en veilig binne hierdie verhouding voel. (Vergelyk Aronstam, 1989:649; Clarkson, 1989:16-17; Orton, 1997:140; Oaklander, 2003:143.) Dus is die terapeut nie 'n beter of belangriker persoon as die adolescent nie. Die terapeut respekteer die adolescent sonder oordeel en plaas nooit druk op die adolescent se gewilligheid of vermoëns nie, maar skep 'n veilige omgewing.

Die totstandkoming van 'n terapeutiese verhouding begin reeds vanaf die eerste ontmoeting tussen die adolescent en die terapeut. In terapie met die adolescent is die verhouding van kardinale belang. Dit is die basis waarop die totale terapeutiese proses berus, maar is ook op sigself terapeuties van aard. (Vergelyk Oaklander, 1988:184; Yssel, 1997:63; Oaklander, 1994:147). Landreth (1991:181) stel dat "*Only when the child begins to feel safe with the therapist will he/she begin to express and explore the emotionally meaningful and sometimes frightening experiences which have been experienced.*" Die daarstelling van die verhouding of '*joining with the child*' moet by elke adolescent se unieke kenmerke aangepas word. (Vergelyk Geldard & Geldard, 1997:39-40; McMahon, 1992:29; Schaeffer & O'Connor, 1983:7.)

Yontef (1993:132) is van mening dat dialoog sentraal in die ek-jy-verhouding staan en beklemtoon die volgende vier eienskappe van dialoog:

- **Insluiting**

Dit beteken om 'n mens self so veel as moontlik in die ervaring (skoene) van 'n ander te plaas sonder om te oordeel, te analiseer of te interpreteer maar terselfdertyd bewus te wees van die onafhanklike eie bestaan en teenwoordigheid. Navorser sien hierdie aspek as die rol van die terapeut waar empatie en onvoorwaardelike aanvaarding ten opsigte van die adolescent moet bestaan. Dit kan soms baie moeilik wees en 'n besondere uitdaging aan die spelterapeut bied.

- **Teenwoordigheid**

Die terapeut deel ervaringe met die individu op 'n gereelde basis en oordeelkundig. Die terapeut deel eie gevoelens, voorkeure en persoonlike ervaringe wanneer nodig. Dit impliseer dus volgens navorser dat die terapeut aktief deelneem en betrokke is by die verhouding en nie net 'n passiewe waarnemer is nie.

- **Ooreenkoms tot dialoog**

Kontak is nie net 'n eensydige handeling nie. Dit is 'n wedersydse instemming tussen die terapeut en die adolescent. Dit is belangrik dat die twee ooreenkoms om dialoog en kontak toe te laat. Navorser is van mening dat dit baie belangrik is dat die adolescent moet samewerking gee en bereid is om by terapie betrek te word, anders vind werklike dialoog nie plaas nie.

#### • Dialoog word uitgeleef

Die partye kan kies hoe hulle wil kommunikeer. Dit kan plaasvind deur dans, sang, woorde of enige iets wat energie opbou en aanleiding gee tot die uitdrukking daarvan. Daar kan dus gebruik gemaak word van enige vorm van nie-verbale of verbale uitdrukking. Die kreatiewe terapeut kan gebruik maak van 'n wye verskeidenheid tegnieke. (Vergelyk ook Schoeman, 1996:32.)

Dit is veral belangrik is om 'n sterk vertrouensverhouding met die adolescent te bou aangesien die adolescent geneig is om nie ander maklik met sy emosionele welstand te vertrou nie en ook nie gestigmatiser wil word deur 'n spelterapeut te besoek nie.

Nadat daar 'n aanvang geneem is met die bou van die verhouding kan oorgaan word tot bewusmaking en kontak by die adolescent.

#### 5.6.2 BEWUSWORDING EN KONTAK

Die adolescent wat vir terapie verwys word, onderdruk dikwels bewustheid en kontak met die self en omgewing as 'n manier om homself te beskerm. Dit gee dan aanleiding tot gedrag wat as kontakgrensversteurings manifesteer (Frankel, 1984:46). Die adolescent se gedrag en opmerkings kan 'n aanduiding wees van die teenwoordigheid van kontakgrensversteurings. (Vergelyk paragraaf 2.5.7.) Dit lei daar toe dat die adolescent bewustheid van sy sintuie, liggaam, emosies en gedagtes onderdruk en derhalwe nie ten volle betrokke kan wees by terapie nie (Oaklander, 1994a:148). Benewens die feit dat kontakmaking 'n belangrike algehele doelstelling van gestaltpelterapie is, is dit ook 'n belangrike voorvereiste vir terapie. Die fokus van terapie is eerstens om die adolescent tot bewustheid en kontak te begelei (Oaklander, 1988:148). Die terapeut is daarom vanaf die eerste onderhoud daarop ingestel om die adolescent se kontakmakingsproses te bepaal en te bevorder. (Vergelyk Geldard & Geldard, 1997:39; Schoeman, 1996:54.)

### 5.6.2.1 SENSORIESE KONTAKMAKING EN SELFONDERSTEUNING

Die mens ervaar sy wêreld deur sy sintuie. Bewustheid van sin vir self ('sense of self) en kontak met die omgewing geskied deur die sintuie. Optimale bewustheid is noodsaaklik vir die aanpassing en hantering van die eise en probleme wat met leerhindernisse gepaardgaan. Deur gestaltterapie kan die adolescent tot verhoogde bewustheid van homself en van sy omgewing gelei word. Deur die adolescent sensorsies op te skerp, word sy selfkennis ('sense of self') versterk en word hy in kontak met homself en sy behoeftes gebring. (Vergelyk Schoeman 1996:42; Oaklander, 1988:110-111; Thompson & Rudolph, 1996:151; McMahon, 1992:44.)

Dit word tans algemeen aanvaar dat liggaamsbeweging en leer onderling verwant is. Adolescent leerders met spesifieke leerhindernisse openbaar ook ontwikkelingsagterstande in motoriese vaardighede (Oaklander, 1988:130). Die gepaardgaande frustrasie en ongelukkigheid vererger die probleem en veroorsaak dat die adolescent huis die aktiwiteite vermy wat noodsaaklik vir sy ontwikkeling is en gevvolglik ook bewustheid blokkeer.

Die adolescent het innerlike selfondersteuning nodig om hom in staat te stel om sy emosies uit te druk (Oaklander, 1994a:148-149). Die verhoging van bewustheid dien as versterking van die sin vir self en selfondersteuning en stel hom in staat om sy mees dominante behoeftes te identifiseer, maniere te vind om dit te bevredig en 'n gevoel van beheer te ervaar (Geldard & Geldard, 1997:167). "*Giving the child experiences that will stimulate and intensify the use of the senses is an important step towards empowering the self.*" (Oaklander, 1994a:149).

Die terapeut moet in die eerste sessie en ook ten aanvang van elke sessie veral fokus op aktiwiteite wat die adolescent se sensoriese bewustheid sal opskerp as grondslag vir selfondersteuning en uiteindelike gevoelsuitdrukking. Aktiwiteite word aangebied om die sintuie (reuk, tas, sien, gehoor en smaak) op te skerp, asook bewustheid van die liggaam en kognitiewe prosesse te verhoog (Oaklander, 1994a:149-150; Geldard & Geldard, 1997:68).

Die gee van keuses en die stel van grense waarbinne die adolescent veilig voel om hierdie keuses uit te oefen, versterk die self en bied geleentheid tot ontwikkeling van selfondersteuning (Landreth, 1991:181).

Oaklander (1988:9) plaas klem op selfgerigte stellings as 'n manier waarop die adolescent homself definieer en ondersteun. Thompson & Rudolph (2000:168) meld dat hierdie stellings die adolescent help om verantwoordelikheid vir sy gevoelens, gedagtes en optrede te aanvaar. Vestiging en versterking van die adolescent se beheer en verantwoordelikheid en dus outonome funksionering.

Die adolescent se bewustheid van sy omgewing kan verhoog word deur al sy sintuie tydens spel op te skerp. (Vergelyk Jennings, 1993:25; Oaklander, 1988:9 Yssel, 1997:65.) Die adolescent wat sensories opgeskerp en in kontak met homself is, kan ook makliker met sy emosies kontak maak en dit uitdruk. Jennings noem sensoriese bewustheid '*embodiment*' wat sy beskou as die grondslag van terapie en stel dit so: "*The body and its relationship with other bodies - through touch and the other senses – forms the basis for the development of identity in all human beings.*"

Nadat die kind sensories opgeskerp is, kan die terapeut begin om projeksietegnieke te benut om die situasie te assesseer. (Vergelyk Jennings, 1993:47; Yssel, 1997:65.)

Die spelerapeut kan volgens Schoeman (1996:53) die kind se sensoriese funksioneringsvlak bepaal deur onvoltooide stellings met betrekking tot sintuie te gee om te voltooi. Die kind moet dan sy gunsteling kleur, reuk, klank, smaak en artikel vir aanraking identifiseer.

Daar is verskeie praktiese wyses waarop sensoriese kontakmaking kan geskied. (Vergelyk Jennings, 1993: 88-91: Thompson & Rudolph, 1996:12; Oaklander 1994a:149.) Voorbeeld om tassintuie te stimuleer is vingerverf, klei, sand speletjies en die aanraking van verskillende tekture. Om visuele stimulus te bevorder kan adolescente na prente met baie detail, sketse en foto's kyk. Opskerping van gehoor kan gedoen word deur na musiek te luister terwyl hulle verf, verskillende instrumentklanke uitken en hoë en laer tone asook sagter en harder klanke onderskei. Met betrekking tot smaak stel hulle voor dat adolescente verskillende smake proe en ook oor lekker smake of sagte en harde kos praat. Kinders kan aan blomme ruik en reuke in houers (soos parfuum) kan identifiseer om die reuksintuie op te skerp.

Dans en liggaamsbeweging is ook 'n belangrike tegniek om sensoriese kontakmaking te bewerkstellig. Dit kan gebruik word as 'n kreatiewe vorm van selfuitdrukking en is dus belangrik in die organisering van gedagtes en gevoelens. (Vergelyk Oaklander, 1988:127; McMahon, 1992:76.) Yssel (1997:67) is van mening dat dans of beweging as 'n terapeutiese hulpmiddel gegrond is op die siening dat die liggaam en verstand nie van

mekaar geskei kan word nie. Hierdie gedagte sluit dus aan by holisme as Gestaltbeginsel. Die basiese uitgangspunt is dat liggaamsbeweging innerlike emosionele toestande reflekter. Emosies word dus losgemaak en die kind kan bewus raak daarvan en dit dan makliker projekteer. Crompton (in Van der Merwe:1996:78) meld dat beweging op musiek gebruik kan word om die kind te laat ontspan ten einde effektiewe kommunikasie te verseker. Sherborne in Jennings (1993:13) stel dit so: "*Children should be able to experience the centre of the body and thereby experience the continuity of movement flow through the body.*"

Liggaamsbeweging kan op verskeie maniere tydens sensoriese opsckerping gebruik word. Musiek kan gespeel word waartydens die kinders op die maat van dromslae beweeg of dit wat hulle hoor deur beweging voorstel. Vrye beweging en dans kan binne groepverband veral effektief wees wanneer die verskillende groeplede die geleentheid gebied word om op die maat van musiek volgens hulle behoeftes te beweeg. So word daar aan elke kind 'n keuse gebied oor hoe hy homself wil uitdruk. Fantasie en beweging kan gekombineer word deurdat die kind gevra word om soos 'n spesifieke dier te beweeg wanneer musiek gespeel word.

Jennings (1993:25-45) spandeer 'n groot deel van terapie aan bewusmaking van die liggaam (*embodiment and sensory play*). Sy kombineer ook bibliospel in die vorm van 'n storie vertel terwyl liggaamsbewegings gedoen word. Sy is ook van mening dat die terapeut gemaklik moet voel met sy eie liggaam alvorens daar met die kind en sensoriese bewustheid gevorder kan word. In hierdie navorsing word gebruik gemaak van ontspanningsoefening soos beskryf in Oaklander (1988:125). Daar is ook gebruik gemaak van 'n spieël waarin die adolescent moes kyk om visuele bewustheid van hul liggaam te bewerkstellig. (Vergelyk tabel 6.4.)

Om kinders te help om hul emosies uit te druk, word baie kreatiewe, ekspressiewe en projektiwe tegnieke gebruik. Dit sluit in teken, verf, klei, begeleide fantasie, storievertelling, handpoppe, musiek, metafore, liggaamsbeweging en sintuiglike bewustheid in. Oaklander (1994a:151) wys daarop dat hierdie medium sterke gevoelens kan ontlok.

### 5.6.2.2 EMOSIONELE BEWUSTHEID

Tydens die intervensieprogram word die adolescent bewus gemaak van die hele spektrum van emosies wat deur 'n mens ervaar kan word. Die adolescent kan dan tot verhoogde bewustheid van spesifieke emosies wat hy ervaar, gelei word. Geleentheid vir projeksie

en uitdrukking van die emosies word gebied, sodat die adolescent dit kan erken, besit, verwerk en tot autonome funksionering kan groei (Geldard & Geldard, 1999:42). (Verwys paragraaf 6.3.) Emosionele bewusheid kan bevorder word deur die gebruik van emosiegesiggies of die emosionele barometer (Van der Merwe, 1996d:125). Vir die adolescent kan werkskaarte baie sinvol benut word om emosionele bewusheid te bewerkstellig (Geldard & Geldard, 1999:187-220).

### **5.6.3 BENUTTING VAN TOEPASLIKE SPELMEDIA EN TEGNIEKE TEN EINDE DIE ADOLESSENTE LEERDER MET SPESifieKE LEERHINDERNISSE TE HELP OM SY STORIE TE VERTEL**

Die verskillende aktiwiteite, spelmedia en speltegnieke in ontspannings-, assesserings-, gedramatiserde-, skeppende- en bibliospel word aangewend om in dialoog te tree met die kind en emosionele uitdrukking binne 'n veilige, ondersteunende omgewing te bevorder (Van der Merwe, 1996e:12; Geldard & Geldard, 1999:41-52; Yssel, 1999:129-160; Joubert, 1997:159-160). Sommige terapeute laat die adolescent toe om self 'n keuse te maak rakende die seleksie van spel en spelmateriale gedurende die terapiesessie. (Vergelyk McMahon, 1992:65; Oaklander, 1993:289-290; Axline, 1996:87). Ander terapeute verkies om, op grond van die inligting oor die adolescent en sy agtergrond, vooraf 'n seleksie van spel en -materiale te maak (Geldard & Geldard, 1997:38).

Dit wat die adolescent leerder met leerhindernisse rondom sy leerhindernisse of sy sosio-emosionele funksionering projekteer, gee 'n aanduiding van hoe hy die invloed daarvan in sy lewe ervaar. Die adolescent moet deur verskeie mediums geleentheid gebied word om gevoelens te projekteer en hierdie gevoelens te verbaliseer ten einde verhoogde selfbegrip te bereik, in bewusheid te groei en in kontak te kom met homself en sy omgewing. (Vergelyk paragraaf 2.6.2)

In hierdie studie het navorser op grond van die kwalitatiewe studie die tegniek bepaal, maar die adolescent leerder met leerhindernisse is geleentheid gebied om 'n keuse uit te oefen ten opsigte van twee media.

Spelmedia en speltegnieke verskaf aan die adolescent leerder met spesifieke leerhindernisse geleentheid tot projektering van sy voorgrondbehoefte. Oaklander (1994a:151) stel dit so: "*To help children express emotions that they have kept hidden, as well as to experience and strengthen lost and stagnant parts of themselves, many creative, expressive, projective techniques are used in the therapeutic process.*"

Die terapeut maak gebruik van 'n verskeidenheid van aktiwiteite en tegnieke om emosionele uitdrukking te bevorder, deur die adolescent te lei om oor sy projeksies te praat, gevoelens daaromtrent te ontdek, te erken, en as sy eie te aanvaar (Geldard & Geldard, 1999:42; Oaklander, 1994a:151). Oaklander (1988:53-56) maak gebruik van veertien stappe waarmee die adolescent se projeksies geleidelik deurgetrek kan word vanaf die veilige afstand van sy skepping tot sy eie lewe waar enige '*unfinished business*' aangespreek en in die hier-en-nou afgehandel kan word. Dit verskaf aan die terapeut riglyne waarvolgens met die adolescent gekommunikeer kan word om sy skepping te kan bespreek. (Vergelyk paragraaf 5.6.3.1.3.)

Die geleentheid om gevoelens openlik in die hier-en-nou situasie uit te druk, laat die adolescent 'n gevoel van beheer ervaar en versterk die sin vir self (Landreth, 1991:186). Die terapeut het 'n belangrike taak om die adolescent te bemagtig om beheer oor sy situasie te kry en oplossings vir sy probleme te vind (Yssel, 1999:150-152). Beheer vind inslag in die terapeutiese situasie deur die adolescent soveel as moontlik keuses en besluite te laat neem, maar moet ook na sy alledaagse lewe deurgetrek word. (Vergelyk paragraaf 6.3.3.) Bemagtiging vind ook plaas deurdat die adolescent geleentheid kry om met nuwe gedrag te eksperimenteer; eers binne die terapeutiese sessie en dan in sy alledaagse lewe. (Vergelyk Yssel, 1999:155-156; Winter 2003:56).

Gedurende die terapeutiese proses sal die terapeut aanvanklik die adolescent uitnooi om te praat oor die media en wat hy met die media gedoen het. Later sal die fokus weg beweeg van die inhoud van die aktiwiteit en media en eerder fokus op die adolescent se lewenssituasie en '*unfinished business*'. (Vergelyk Geldard & Geldard, 1999: 69.)

Deur middel van die terapeutiese tegnieke en media word die adolescent gehelp om deur die verskillende lae van bewustheid (vergelyk paragraaf 2.5.10) te beweeg om vanaf fragmentasie van die persoonlikheid tot kontak en gestaltformasie (vergelyk paragraaf 2.5.2; 2.5.6) te beweeg.

### 5.6.3.1 VORME VAN SPEL EN SPELMEDIA

Winnicott (in McMahon, 1992:27) verwys na 'n spelmedium as: "*the third thing*", met ander woorde, iets wat op 'n neutrale gebied tussen die terapeut en die kliënt gebruik word as hulpmiddel tot kommunikasie:

*"We try to establish between ourselves and the children a neutral area in which communication is indirect. In other words we participate in shared*

*experiences, about which both we and the children feel something about something else, a **third thing**, which unites us, but which at the same time keeps us safely apart because it does not involve direct exchange between us. The 'third thing' may be an outing or journey, a pet, a hobby or interest, but equally it may be a toy or game, or simply play."*

Die belangrikheid van toepaslike media word soos volg deur Geldard en Geldard (1999:40) uitgespel: "... effective joining followed by effective therapy is usually possible if the child is invited to tell her story through the use of play or suitable media".

Volgens Oaklander (1994a:151) kan kreatiewe, ekspressiewe en projektiwe tegnieke gebruik word om adolesente te help om hulle emosies uit te druk. Hierdie media kan verf, teken, collage, klei, fantasie, stories, onvoltooide sinne, handpoppe, musiek, metafore, liggaamsbeweging en sintuiglike bewusheid insluit, wat sterk gevoelens kan ontlok en aan die kind die geleentheid tot uitdrukking bied.

Die wyer doelstelling van gestaltpelterapie met die adolesente leerder met leerhindernisse sluit die ontwikkeling van die adolescent se vermoë tot meer toepaslike hantering van sy emosies, en die handhawing van meer suksesvolle verhoudings met maats en gesagsfigure, in (Guerney, 1983:423). Dit fokus dus op die ontwikkelingswaarde sowel as die terapeutiese waarde van die spelterapie ervaring van die adolescent. Navorsing is van mening dat spelmedia by die ontwikkelingsfase van die kind of adolescent aangepas moet word, maar dat daar tog sekere 'universele' spelterapietegnieke is wat op alle ouderdomme van toepassing is, soos vingerverf, teken en klei.

Vervolgens word die toepaslike mediums en tegnieke wat tydens projeksie in gestaltpelterapie met die adolesente leerder met leerhindernisse aangewend kan word, bespreek.

#### 5.6.3.1.1 GEDRAMATISEERDE SPEL

Gedramatiseerde spel as vorm van spelterapie word soos volg deur Van der Merwe (1996c:128) omskryf: "...dramatic play, as a form of play, offers the child the opportunity to grow by acting out situations and dramatising in a safe, non-threatening environment."

Dit is vrye spel wat verskillende funksies het soos hermodellering van die gesinslewe, uitdrukking van aggressie of regressie, uitspeel van gevoelens ten opsigte van geslagsrolle, traumatische gebeure en voorbereiding vir antisiperende probleme (Vergelyk Van der Merwe, 1996e:12; Joubert 1997:160). 'n Verskeidenheid spelmateriaal kan

gebruik word soos: 'n telefoon, motors, maskers, plaas- of wilde diere, handpoppe, soldate, gewere, klei, musiekinstrumente, hamers, spykers, vliegtuie, treine, kombuisware, fantasieklore, doktersinstrumente, bababottels, musiek om te dans of vir bewegings. (Vergelyk Schoeman 1996:85; Van der Merwe, 1996f:130; Geldard & Geldard, 1999:147.) Navorser is van mening dat hierdie spelmateriaal nie baie toepaslik is vir die adolescent in die algemeen nie en eerder vir jonger kinders toepaslik is.

Die volgende speletjies is wel toepaslik vir adolescentte:

- **Privaatheid en beheer.** In 'n ontdekkingsspeletjie word 'n rolspel deur twee persone uitgespeel. 'n 'Ouer' gee voor dat 'n simbool (of maak asof hy een het) ontdek is in 'n adolescent se kamer wat aanleiding gee tot bekommernis. Beide rolspel die ontdekking en konfrontasie. Deelnemers ruil rolle om en bespreek die onderhandelinge.
- **Triade magspeletjie.** In 'n 'meester-slaaf' speletjie sal een ouer die adolescent in 'n taak forseer (gewoonlik om iets te doen of te maak) terwyl die ander ouer waarneem en intree of neutraal bly. Rolle word omgeruil sodat alle partye die ervaring kan kry van om geforseer te word om iets te doen.
- **Identiteit.** Deelnemers word gevra om temas soos "Wie is ek nou?", "Waarvan ek nie in my self hou nie," "Waarvan ek in myself hou," "Hoe ek wil wees oor vyf jaar." "Die ideale maat vir my." Gedigte of liedere kan hier 'n betekenisvolle medium wees.

#### 5.6.3.1.2 SKEPPENDE SPEL

Skeppende spel sluit in kreatiewe aktiwiteite soos teken, vingerverf, klei- en sandwerk. Vir die intervensieprogram ontwikkel vir hierdie studie is van teken, vingerverf en klei gebruik gemaak (vergelyk paragraaf 6.3).

Volgens (1996f:139) kommunikeer die kind deur skeppende spel dit wat hy nie in staat is om in woorde uit te druk nie. Skeppende spel bied geleentheid vir ontlading van gevoelens, gee 'n gevoel van beheer en bemeesterding aan die kind, en bevorder interaksie tussen die kind en die spelterapeut. (Vergelyk Geldard & Geldard, 1999:121.)

Deur skeppende spel word 'n ontspanne atmosfeer verkry wat kommunikasie bevorder. Navorser is van mening dat 'n skoolatmosfeer vermy moet word aangesien die adolescent leerder met spesifieke leerhindernisse geneig sal wees om so 'n atmosfeer met spanning en mislukking te assosieer. Dit gaan nie oor die korrektheid en skoonheid van die skepping nie, maar oor die projektiewe waarde van die skepping. Ten opsigte

hiervan is Geldard en Geldard (1999:122) van mening dat die adolescent in sy tekeninge meer fokus op sy emosionele en subjektiewe ervarings eerder as dit wat hy sien. Kleure word dan ook gebruik in reaksie op emosies. Rubin (1978:42) sluit hierby aan wanneer sy beweer dat emosies die gedrag van adolescenten grootliks rig en beïnvloed. Sy is egter verder van mening dat die wyse waarop 'n kind van enige ouerdom skep - op 'n kalm of berekende manier of op 'n slordige en impulsieve wyse - word deur affektiewe eerder as kognitiewe faktore beïnvloed. Navorser ondersteun hierdie menings en beskou skeppende spel juis daarom as 'n uitstekende media waarop die adolescent sy voorgrondbehoeftes kan projekteer sodat dit deur die terapeutiese proses afgehandel en geïntegreer kan word.

Wanneer skeppende spel in gestaltpeloterapie gebruik word, kan die volgende prosedure gevolg word:

- Die kind word versoek om 'n skepping te maak wat hy graag wil of na aanleiding van 'n tema wat die terapeut voorstel.
- Daarna word met die kind gekommunikeer rondom sy skepping. (Vergelyk paragraaf 5.6.3.1.3.)

Bykomend tot die projektiewe waarde van skeppende spel, sluit die terapeutiese waarde van skeppende spel die volgende in: Ontlading van gevoelens word so vergemaklik en die adolescent word in beheer van sy skeppingswêreld geplaas.

- Daar word aan die adolescent die geleentheid gebied om die omstandighede te manipuleer en te verander soos hy graag wil.
- Daar word aan die adolescent geleentheid gebied vir ontlading van aggressie en woede.
- Daar word aan die adolescent geleentheid gebied om te regresseer indien nodig.

(Vergelyk Blom, 2006:130.)

Navorser is van mening dat skeppende spel 'n besonder toepaslike medium is om te gebruik ten opsigte van die adolescent se leerder met leerhindernisse. Die adolescent kan dus gebruik maak daarvan om sy voorgrondbehoeftes ten opsigte van leerhindernisse of ander sosio-emosionele aspekte te projekteer sodat dit in die terapeutiese situasie aangespreek en hanteer kan word. (Vergelyk paragraaf 5.7.) Die gevoel van beheer wat deur die teken en verf deur die adolescent se leerder met leerhindernisse ervaar word, verskaf ook geleentheid om die sin vir self te versterk. (Vergelyk paragraaf 6.3.3.) Deur in skeppende spel op polariteite te fokus, kan dit ook gebruik word om die adolescent se leerder met leerhindernisse se sin vir self te versterk. (Vergelyk paragraaf 6.3.3.)

### 5.6.3.1.3 TEKEN EN VINGERVERF

Tekeninge en vingerverf word deur Geldard en Geldard (1999:21) as kragtige mediums uitgewys wat die kind toelaat om gevoelens en gedagtes uit te druk. Deur kuns as simboliese taal te gebruik, kan kinders gevoelens ervaar en verwerk en relevante gedrag hanteer.

- **Kenmerke van teken en vingerverf as projektiwe mediums**

Thompson en Rudolph (2000:175) dui aan dat emosie bewustelik of onbewustelik deur kuns geverbaliseer word deurdat die adolescent vingerverf met sy hande of voete kan smeer, kleifigure kan skep en vernietig en prente teken of verf om verwarringe gevoelens uit te druk. So kan die kind sy gevoelens teenoor homself en sy omgewing op media projekteer en stellings maak oor dit wat in sy lewe gebeur. (Vergelyk Oaklander, 1988:177; Mc Mahon, 1992:179; Schoeman, 1996:74.)

- **Die benutting van tekeninge en verf tydens intervensie**

Binne die gestaltbenadering maak Oaklander dikwels van teken as medium gebruik. Sy vra die adolescent om sy eie wêreld op papier te skep deur van vorms, lyne, kurwes en kleure gebruik te maak. Sy laat hom eers sy oë toemaak en gebruik dan fantasie om hom sy wêreld te laat 'sien' (Oaklander, 1988:21).

Dit is belangrik dat die adolescent gerus gestel moet word dat sy tekenvaardigheid nie getoets word nie (Yssel, 1999:77). (Vergelyk paragraaf 5.5.2.1.1.) Die terapeut moet in ag neem dat die tekening as kommunikasiemedium benut word en in der waarheid slegs die adolescent se voorgrondbehoefte en emosies moet weerspieël. Die terapeut moet ook deurgaans aandag aan die adolescent se benadering van die taak gee, aangesien dit sy proses weerspieël. (Vergelyk paragraaf 5.7.) Oaklander (1988:188) stel dit so: "*How she does the drawing may be indicative of how she is in life, or how she feels at this moment in my office.*"

Die spelterapeut moet nie self die adolescent se skepping interpreteer nie (Oaklander, 1988:188). Alhoewel die terapeut se interpretasie waar mag wees, moet dit eers deur die adolescent bevestig word. (Vergelyk West, 1992:66.)

Moontlike tegnieke om die adolescent te help om deur die gebruik van teken en verfwerk aan sy gevoelens uitdrukking te gee, is volgens Oaklander (1988:53) eindeloos. Wat die kind ook al kies om te doen, die doelstelling bly dieselfde. Haar doel met die projeksie as kommunikasiemedium is om die adolescent te lei tot bewustheid van homself en sy

bestaan. **Oaklander maak gebruik van veertien stappe** wat bekend staan as haar **model**. Dit is 'n proses waartydens die adolescent gelei word tot selfbewustheid en kontak (Oaklander, 1988:53-56). (Vergelyk paragrawe 2.5.4 -2.5.6.)

- Die terapeut motiveer die kind om sy ervaring ten opsigte van die teken van sy prent met haar te deel. Sy bepaal watter gevoelens betrokke was en hoe die taak benader en voltooi is.
- Die terapeut laat die kind die tekening met haar deel. Sy laat hom dit in sy eie woorde beskryf.
- Op 'n dieper vlak motiveer die terapeut die kind nou tot verdere selfontdekking deur hom te vra om op verskillende dele van die tekening uit te brei en dit te verduidelik. Hy moet die vorme, kleure, voorstellings, objekte en mense in sy prent verduidelik.
- Daar kan nou aan die kind gevra word om sy tekening te beskryf asof hy die tekening is. Die woorde "ek is die prentjie" kan benut word. Byvoorbeeld "Ek het rooi kolletjies orals oor my en 'n swart blokkie in my middel."
- Die terapeut kies nou spesifieke dele in die prent waarmee die kind moet identifiseer. Die kind kan byvoorbeeld gevra word om die swart vierkant te wees en homself te beskryf.
- Vrae kan aan die kind gevra word om die proses aan te help, byvoorbeeld "Wat maak jy, wie gebruik jou, aan wie is jy die naaste?" Die terapeut kry dus die geleentheid om "in die tekening in te beweeg". 'n Geleentheid vir betrokkendheid word geskep.
- 'n Sekere deel van die skepping kan uitgelig en oorbeklemtoon word om sodoende die kind se aandag te fokus. Die kind moet aangemoedig word om so ver as moontlik oor hierdie deel te kommunikeer. Vrae word dikwels hier benodig, byvoorbeeld: "Wat dink die boompie nou?" of "Wat gaan sy nou doen?" Die terapeut moet nie moed opgee indien die kind sê dat hy nie weet nie. Daar moet dan oorgegaan word na 'n volgende deel van die prentjie. Die terapeut kan ook vir die kind haar eie antwoorde gee en vra of dit reg is.
- Die kind moet beweeg word om 'n gesprek tussen twee dele van die prent te voer ten einde polariteite te gebruik.
- Die terapeut moedig die kind aan om aandag te skenk aan die kleure wat gebruik is. Sy vra hom wat die betekenis van sekere kleure vir hom is.
- Die terapeut moet op leidrade in die kind se stem of liggaamshouding, gesigsuitdrukkings, asemhaling en stiltes let. Stiltes kan beteken dat hy besig is om iets uit te sorteer, dat hy dink, angs en spanning ervaar of net van iets bewus is.
- Die terapeut help die kind om sy tekening te besit. Hy moet met die tekening kan identifiseer. Die kind kan gevra word of hy dikwels so voel en of dit in sy lewe inpas.

- Die terapeut verlaat die tekening en werk met die kind se lewensituasie en onvoltooidhede wat in die tekening uitkom. Die tekening moet nou met die kind se eie leefwêreld en sy belewenis daarvan in verband gebring word. Die kind moet ook gevra word of daar 'n ooreenkoms tussen sy lewe en sy tekening is.
- Die terapeut soek die ontbrekende dele in die prent en skenk daaraan aandag.
- Die terapeut bly nou by die kind se voorgrond. Polariteite kan gebruik word indien dit nodig geag word.

Dit is belangrik om te onthou dat al veertien stappe nie in een sessie benut hoeft te word nie of in presies dieselfde volgorde nie. Dit is 'n medium om by die adolescent se behoeftes, gevoelens en belewenisse uit te kom en dit te hanteer en word dus gebruik soos nodig.

#### 5.6.3.1.4 KLEIWERK

Klei is sag, buigbaar en kan morserig wees en laat die kind toe om deur belangrike interne prosesse te werk. Klei as medium kan effektief deur al die fases van gestaltpelterapie-proses gebruik word. Dit kan as 'n medium vir sensoriese kontakmaking gebruik word sowel as gedurende die emosionele bewuswordingsfase, aangesien dit die adolescent geleentheid bied om emosies op 'n simboliese vlak te projekteer. (Vergelyk Yssel, 1997:170; Blom, 2006:140). Oaklander (1988:69) beskou dit as haar gunsteling medium en is oortuig dat dit die mens in kontak met sy gevoelens bring. Navorser beskou dit ook as haar gunsteling media aangesien dit so 'n wye spektrum van emosies aanspreek en ook deur kliënte van alle ouderdomme benut kan word. Oaklander (1988:69-71) se benadering tot die gebruik van klei en teken is baie dieselfde. Sy laat die kind eers ontspan waarna daar op sensoriese kontakmaking met die klei gefokus word. (Vergelyk paragrawe 2.5.4; 5.6.2.1.) Die kind kan die tekstuur van die klei ondersoek en dit druk, daaraan ruik en selfs proe indien moontlik. Hierna word die kind geleentheid gegee om iets uit klei te vorm en dan word hy gevra om dit van alle kante te beskou (fokus op polariteite). Tydens bespreking word die kind gevra om die kleiskepping te wees en ook 'n stem daarvoor te wees. Dit wat op die kleiskepping geprojekteer is, word na die kind se eie lewe deurgetrek. Sy meld verder dat dit noodsaaklik is om op die kind se asemhaling, gesigsuitdrukking en totale liggaamshouding te let. (Vergelyk Yssel, 1999:135.)

Die adolescent kan kreatief wees deur middel van kleispel en uitdrukking gee aan 'n wye verskeidenheid emosies. Hy kan dit saggies strel, dit aggressief knyp of dit uit frustrasie uitmekaar skeur. (Vergelyk Oaklander, 1988:69; Geldard & Geldard, 1999:113). Klei het 'n

katarsiese uitwerking op die kind wat hom in staat stel om ingehoue gevoelens uit te druk en te besit (Geldard & Geldard, 1999:113).

Geldard & Geldard (1999:116) meld dat klei benut kan word om spesifieke sake aan te spreek en dat die kind gevra kan word om iets spesifiek uit die klei te maak. Tydens terapie met die adolescentleerdeur met leerhindernisse kan die terapeut vra dat hy 'n voorstelling maak van die akademiemonster. Hy kan hierdie monster direk aanspreek en selfs platdruk indien hy wil.

Klei bied aan die adolescent 'n gevoel van bemeesterding. Dit kan dus gebruik word in die versterking van die sin vir self. (Vergelyk paragraaf 6.3.3.) Geldard & Geldard (1999:113) meld dat kleiwerk veral van waarde is vir die kind wat minderwaardig oor sy kreatiewe vaardighede voel, omdat hierdie medium min vaardigheid benodig – die kans vir mislukking is dus baie klein.

Daar word deur Geldard & Geldard (1999:118) aanbeveel dat die kind self kan besluit wat met die kleiskepping moet gebeur wanneer hy nijs verder daaroor wil sê nie. Die kind kan self sy kleiskepping tot 'n bol klei vorm en bêre, of hy kan die terapeut vra om dit te doen nadat hy weg is.

#### 5.6.3.1.5 BIBLIOSPEL EN ONVOLTOOIDE SINNE

Hier kan stories, storieboeke, gedigte, briewe, lewensboeke, projeksiekaarte, dagboeke, strokiesprente of prente uit tydskrifte gebruik word (Van der Merwe, 1996d:108). Navorsers wil hierby ook onvoltooide sinne as tegniek voeg as 'n metode waar die adolescent geleentheid gegee word om sy ervaringe mee te deel. Onvoltooide sinne kan gebruik word om die temas op die adolescent se voorgrond te bepaal asook die voorgrondbehoeftes wat gedurende terapie moet aandag kry (Blom, 2006:198.)

Bibliospel sluit in:

- 'n Ysbreker om by die kind se probleem uit te kom.
- "Eendag lank, lank gelede..." help die kind om afstand te skep tussen hom en die storiekarakter.
- 'n Geleentheid om sy gevoelens op die karakters te projekteer.
- 'n Kans om wanbegrippe by die kind uit die weg te ruim.
- Veilige emosionele ontlading.
- 'n Kanaal waarlangs hy sy verbode en bedreigde wêreld kan betree.

- 'n Geleentheid om modelle te manipuleer om sy onvoltooidhede aan te spreek.
- 'n Geleentheid om deur die storie of gedig die kind te laat besef dat ander persone 'n soorgelyke probleem ervaar.
- 'n Geleentheid vir die kind om wense, hoop en fantasie uit te spreek.
- Modelle vir positiewe gedragshantering.

(Vergelyk Van der Merwe, 1996d:108; Oaklander 1988:85; Geldard & Geldard, 1999:137.)

Navorser is van mening dat in die geval van die adolescent leerder met leerhindernisse veral van tydskrifte, dagboeke, strokiesprente of gedigte gebruik gemaak kan word. Daar moet egter in ag geneem word dat die adolescent leerder met leerhindernisse probleme mag ondervind om te skryf of te lees en dat hy weerstand teen sodanige media kan toon en verleenheid ervaar indien van hom verwag word om te lees of te skryf. Die terapeut moet baie sensitief wees daarvoor. Indien die terapeut lees of skryf of aktiwiteite binne die adolescent se vermoë aangewend word kan dit ook dien tot die versterking van die sin vir self. (Vergelyk paragrawe 3.9.1; 3.9.2; 6.3.3.)

#### 5.6.3.1.6 FANTASIE EN METAFOOR

Vanuit die gestaltteoretiese raamwerk word fantasieë en metafore beskou as die metaforiese uitdrukking van selfervaring en kan dit gedurende terapie gebruik word om '*unfinished business*' waarvan die kind onbewus is, na die voorgrond te bring (Blom, 2006:169). Fantasie vorm deel van die kind se normale ontwikkeling. Die woord fantasie is afgelei van die Latynse woord '*phantasticus*' wat beteken '*to make something visible*'. Die konsep fantasie beteken dus dat 'n intellektuele beeld vir die kind sigbaar gemaak is. (Vergelyk Blom, 2006:170; Schoeman, 1996:85.) Navorser wil dit in Afrikaans vertaal met 'denkbeeldig' wat dan ook beteken om ' 'n beeld te hê waaraan jy dink'.

Volgens Joubert en Bauling (2000:29) is fantasie, 'n interne proses wat nie deur rasionele denke of eksterne realiteit beïnvloed word nie.

Schoeman (1996:86) verduidelik fantasie by die kind soos volg: "*The child who fantasize is actually busy organising and arranging reality as his imagination allows. This rearranging of his imaginary world is a creative action and an artistic expression. It is an interpretation of his abilities in imaginary form*".

Deur middel van fantasie word die kind geleentheid gebied om gedrag in te oefen en om suksesse te beleef wat andersins in die werklike lewe onmoontlik sou wees. Dit gee dan aan die kind 'n gevoel van beheer wat weer die sin vir die self kan versterk. (Vergelyk

paragraaf 6.3.3.) Sulke ervaringe blyk meer toepaslike en aangepaste gedrag in die werklike tot gevolg te hê. Alhoewel die mening algemeen gehuldig word dat kinders met spesifieke leerhindernisse, veral hiperaktiewe kinders, oor die algemeen konkreet in hul denke is, is hulle in staat om te fantaseer sowel as om betrokke te raak by meer realistiese spel, soos balspeletjies (Guerney, 1983:422).

Fantasie speletjies kan groot pret verskaf aan kinders van alle ouderdomme en kan hulle bewus maak van hulle gevoelens in die hier-en-nou. Navorsing is van mening dat fantasering die regterbrein hemisfeer stimuleer en daarom integrasie van die heelbrein bevorder, wat tot voordeel van die adolesente leerder met leerhindernisse kan wees. (Vergelyk paragraaf 5.4.1.7.) In hierdie navorsing is fantasie en ontspanningsoefening soos deur Oaklander (1988:125) beskryf, gekombineer. (Vergelyk tabel 6.4; paragraaf 5.6.3.1.6.)

'n Metafoor kan gedefinieer word as 'n metaforiese, denkbeeldige uitdrukking gebaseer op 'n vergelyking en ooreenkoms – met ander woorde 'n prentjie word in die plek van die werklikheid geplaas (Blom, 2006:170). Schoeman (1996:86) beskryf die metafoor as 'n manier om simbolies te kommunikeer. Dieselfde skrywer meld dat die metafoor waarde het in die sin dat die kind daarvan kan leer en dat dit sy persepsie oor sy wêreld kan vorm. Joubert en Bauling (2000:29) meld dat 'n metafoor empatiese begrip bied. 'n Kind kan met die karakters identifiseer, assosieer en weer ontrek. Indien die metafoor sterk aansluit by die kind se omstandighede kan dit die geleentheid aan die kind bied om alternatiewe gedrag te ondersoek en die beste opsie te kies (Schoeman, 1996:87). Die metafoor is vir die kind 'n platvorm vanwaar hy sy werklike behoeftes kan uitspeel en sluit dus inhoudelik by fantasie speletjies aan.

Die adolesente leerder met leerhindernisse se sin vir self kan versterk word deur van fantasie en die metafoor as spelmedium gebruik te maak. Die adolescent word dan die geleentheid gebied om binne 'n veilige omgewing uiting aan sy wense te gee en hy kan sodoende 'n gevoel van beheer ervaar.

### **5.6.3.1.7 MUSIEK AS TERAPEUTIESE HULPMIDDEL**

Mense reageer verskillend op musiek. Dit kan wissel van vreugde tot hartseer, die oproep van assosiasies of die begeerte om te dans of beweeg. Alvin in Keesenberg (1993:84) noem dat musiek verborge emosies na die bewussyn bring en emosionele ontlading moontlik maak.

Musiek laat die kind ontspan, verskaf genot en dra gevolglik by tot verhoging van selfwaarde. Musiek bevorder kommunikasie tussen die kind en die terapeut (Keesenberg, 1993:84).

Aangesien musiek 'n woordlose kommunikasiemiddel is, sluit dit goed aan by die behoefte van die adolessente leerder met leerhindernisse wat gefokus is op aksies om emosies weer te gee, eerder as woorde. (Vergelyk paragraaf 6.3.3.) Ritme en klank kan dus benut word om uiting aan emosies te gee. Die adolescent beweeg ook volgens navorser in 'n sub-kultuur wat musiek aanbetrif, dit is dus uiters noodsaaklik dat die terapeut kennis moet dra van die soort musiek waarvan adolessente hou en ook bereid wees om tydens terapie daarna te luister. Dit sal die adolescent se sin vir self versterk aangesien dit 'n gevoel van aanvaarding aan hom oordra. (Vergelyk paragraaf 6.3.3.)

#### **5.6.4 DIE FASILITERING VAN EMOSIONELE UITDrukking EN DIE HANTERING VAN EMOSIES**

Navorser is daarvan oortuig dat die gebruik van gestaltspelterapeutiese tegnieke die adolessente leerder met leerhindernisse in staat sal stel om binne 'n veilige terapeutiese verhouding sy voorgrondbehoeftes te projekteer en te hanteer ten einde sosio-emosionele funksionering te verbeter en verhoogde akademiese prestasie tot gevolg hê.

Die belangrikheid van projeksie as deel van die terapeutiese proses word soos volg deur Geldard & Geldard (1999:41) gestel: "*Inviting the child to tell her story, and enabling the child to tell her story, are the most central and effective components of any child psychotherapy process. Through telling her story, the child has the opportunity to clarify and gain a cognitive understanding of events and issues. The child becomes personally engaged and involved in the therapeutic experience with the consequence that intrapersonal psychological change is almost certain to occur.*"

Projeksie in terapie is volgens Oaklander (1988:193) 'n belangrike hulpmiddel. Wat 'n kind deur middel van projeksies uitdruk, wys op sy fantasieë, vrese, frustrasie, behoeftes, wense en gevoelens – dit is dikwels die enigste wyse waardeur die kind homself sal blootstel. Landreth (1991:11) sluit hierby aan deur te noem dat gevoelens wat te bedreigend is om direk uit te spreek, deur spel geprojekteer kan word. (Vergelyk paragrawe 2.5.8; 2.7.)

Vervolgens word sowel die adolescent se emosionele uitdrukking en hantering van sy emosies bespreek.

- **Verhoging van die adolescent se bewusheid van die emosies wat hy ervaar**

Volgens Oaklander (1988:285) kan bewusheid van die hier-en-nou bereik word deurdat die terapeut deurentyd op die adolescent se direkte ervaring van die hede fokus. (Vergelyk paragraaf 2.5.6.)

- **Die spelterapeut se hantering van die adolescent se emosies**

Die terapeut se hantering van die emosies wat deur die adolescent uitgedruk word, is belangrik. Schoeman (1996:176) is van mening dat adolescente heeltemal daartoe in staat is om te leer hoe om hul gevoelens te hanteer as die terapeut hulle die aanmoediging en geleentheid daartoe bied.

Volgens Landreth (1991:83) dien speltherapie as 'n geleentheid waar die adolescent geleentheid kry om die intensiteit van sy gevoelens in die teenwoordigheid van 'n aanvaardende volwassene uit te speel. Adolescente leer dat hulle gevoelens aanvaarbaar is, en om meer oop te wees in die uitdrukking daarvan. Volgens Blom (2006:123) sal adolescente dikwels hul emosies deur middel van gedrag weerspieël eerder as deur verbalisering.

In die proses van emosionele hantering, moet die adolescent veilig voel in die terapeut se teenwoordigheid. Axline (1989:69) wys daarop dat die terapeut 'n atmosfeer van vrymoedigheid in die verhouding skep sodat die adolescent vry kan voel om sy gevoelens ten volle uit te druk. Die adolescent moet bewus wees van die wyse waarop hy sy emosies hanteer, en ook verdere vaardighede aanleer om hierdie emosies suksesvol te hanteer. Sodoende kan die adolescent 'n oplossing vir sy situasie vind.

### 5.6.5 SELFVERTROETELING

Selfvertroeteling behels dat die adolescent gehelp word om die dele van die self waarvan hy nie hou nie, te leer aanvaar sodat die selfbeeld en gevoel van selfwaarde versterk kan word (Oaklander, 1994a:152). Sodoende vind integrasie van die totale self plaas. Deur middel van projeksie kan die adolescent gehelp word om onaanvaarbare dele van homself te identifiseer en in die self te integreer. (Oaklander, 1994a:152). Deur middel van selfvertroeteling kan die adolescent gehelp word om die self te versterk en leer die adolescent dat elke mens polariteite beleef en, indien hy nie van een aspek van homself hou nie, dit nie beteken dat sy hele wese nie aanvaarbaar is nie (Oaklander, 1994a:153; Blom, 2006:151).

### 5.6.6 ONTWIKKELING VAN TOEPASLIKE GEDRAG

Die simptomatiese gedrag waaroor die adolescent vir terapie verwys is, verdwyn gewoonlik namate die terapeutiese proses vorder en die adolescent kontakvaardighede, selfonderhouding en gevoelsontlading ontwikkel (Oaklander, 1994a:153-154; Blom, 2006:157). Soms gebeur dit dat sekere ontoepaslike gedrag bly voortbestaan. Dit vereis dat die adolescent bewus gemaak word van hierdie gedrag en dat aktiwiteite daar gestel word wat hom in staat stel om met nuwe toepaslike gedrag te eksperimenteer. Wanneer die terapeut die adolescent op 'n sensitiewe wyse met ontoepaslike gedrag konfronteer, verkry hy insig in faktore of gedrag wat sy groei belemmer en word hy so tot verantwoordelike gedrag aangemoedig.

### 5.6.7 STEUNSTELSEL

Gedurende hierdie stadium van die spelterapieproses, word die adolescentleerder met spesifieke leerhindernisse bewus van, en ontwikkel 'n steunstelsel. Wanneer daar terapeuties met 'n kind of 'n adolescent gewerk word, is dit volgens Geldard en Geldard (1999:43) noodsaaklik om sy omgewing in ag te neem. Die belangrikste deel van sy omgewing is gewoonlik die gesin of familie. Indien daar slegs met die kind gewerk word, kan dit die impak van terapie benadeel as gevolg van sirkulêre prosesse (Geldard & Geldard, 1999:43). Schoeman (1996:63) is van mening dat alhoewel dit moontlik nodig mag wees om ouers te betrek, dit slegs sekondêr tot die kind moet geskied. Wanneer verandering by die adolescent voorkom, mag weerstand by die gesin voorkom, en dit is nodig dat die gesin dit verstaan, asook die feit dat die adolescent periodes van regressie mag ervaar.

Tydens hierdie ondersoek is daar kontak met die versorgers behou sover moontlik en wedersydse terugvoer is gegee.

### 5.6.8 TERMINERING

In die gestaltbenadering is terminering 'n belangrike deel van die terapie, wat die grondslag vorm vir verdere groei en homeostase (Geldard & Geldard, 1999:45,82; Oaklander, 1994a:155). Terminering behoort derhalwe nooit onverwags plaas te vind nie, maar moet as beplande deel van die hulverleningsproses plaasvind. Terminering is 'n integrale deel van die gestaltterapeutiese proses (Joubert, 1997:115; Oaklander, 1994a:155).

Daar is 'n aantal aanduidings wat die terapeut in ag kan neem om te bepaal wanneer terminering nodig is. Wanneer die kind 'n plato bereik in terapie; wanneer die kind se gedrag wat die aanmeldingsprobleem was sodanig verander het dat hy sonder terapie kan voortgaan of wanneer die sessies meer spel as terapie is.(Vergelyk Oaklander, 1988:199; Geldard & Geldard, 1999:82.)

Dit is onrealisties om te verwag dat 'n adolescent terapie 'probleemvry' sal verlaat. Soms mag daar probleme wees wat steeds teenwoordig is, maar dit is nodig om te termineer indien die voordele van terminering swaarder weeg as die voordele van die terapie. Oaklander (1988:201) is van mening dat dit belangrik is om die kind voor te berei op terminering en hom geleentheid te gee om deur die gepaardgaande gevoelens te werk.

## 5.7 DIE ADOLESSENT SE INTERNE PROSES BINNE DIE GESTALTSPELTERAPIE PROSES

Geldard en Geldard (1999:46) verwys na die interne proses van die adolescent as die spiraal van terapeutiese verandering en sien dit as 'n poging tot verkryging van insig in wat heel waarskynlik binne die adolescent voorkom gelyktydig met die terapeutiese proses. (Vergelyk figuur 5.1.)

Spelterapie moet uitgevoer word met voortdurende in agname van die adolescent se proses: "Dit wat die adolescent doen en die manier hoe hy dit doen (sy proses) het 'n direkte invloed op die tempo en wyse waarop tegnieke benut word. Die spelterapeut moet die terapie dus volgens die adolescent se proses rig..." (Oaklander, 1988:196; Yssel, 1999:110). Die verloop van die terapeutiese proses toon ook 'n direkte ooreenkoms met die verloop van die adolescent se proses tydens terapie.

Die prosesse wat die maatskaplike werker in werking moet stel en faciliteer ten einde terapeutiese verandering in die adolescent se leerder met spesifieke leerhindernisse te weeg te bring, kan gesien word as ekstern tot die adolescent omdat die aksie deur die terapeut geïnisieer word. Soos wat die eksterne prosesse voorkom, sal daar tegelykertyd prosesse intern by die adolescent voorkom wat direk aanleiding gee tot terapeutiese verandering wat deur die adolescent ervaar word (Geldard & Geldard, 1999:45).

Rubin (1978:265) beveel die gebruik van 'n waarnemingsgids aan om objektiewe waarneming van die adolescent se proses te verseker. Die volgende aspekte word waargeneem: die adolescent se benadering tot die materiaal, die mate van absorpsie in

die materiaal, energie gebruik, manipulerende aksies, houding teenoor die materiaal, werkstempo, liggaamsbewegings, verbalisering en die ontwikkeling van verandering oor 'n gegewe tyd. Hierdie interne prosesse kom spontaan in die beradingsopset voor of as respons op die berader se interventionsoptrede. Hierdie proses word soos volg deur Geldard en Geldard, 1999:45-52) voorgestel. Waar toepaslik word ander bronne bygewerk.

#### **5.7.1 DIE ADOLESSENT OPENBAAR PROBLEEM GEDRAG OF ERVAAR EMOSIONELE UITDAGINGS**

Die adolescent word gewoonlik vir berading gebring omdat daar gedragsprobleme openbaar word, soos 'n gebrek aan konsentrasie, ongehoorsaamheid, angstigheid en depressie. Dikwels sal die feit dat die adolescent emosionele probleme ervaar, nie deur volwassenes raakgesien en erken word as die rede vir verwysing nie, maar eerder die overte gedragsprobleme.

#### **5.7.2 DIE ADOLESSENT BIND MET DIE TERAPEUT**

Indien die adolescent en terapeut suksesvol bind sal dit die terapeutiese proses bevorder. Die totstandkoming van 'n ek-jy-verhouding is belangrik as grondslag vir terapie.

#### **5.7.3 DIE ADOLESSENT BEGIN OM SY STORIE TE VERTEL**

Binne 'n veilige omgewing met gepaste media en met die terapeut wat gepaste beradingsvaardighede gebruik, sal die adolescent spontaan betrokke raak by die vertelling van sy storie.

#### **5.7.4 DIE ADOLESSENT SE BEWUSTHEID VAN ASPEKTE VERHOOG**

Soos die adolescent sy storie vertel sal bewustheid van sterk emosies en/of pynlike aangeleenthede intensifiseer word. Die adolescent kan ten spyte daarvan voortgaan om sy storie te vertel en sodoende die terapeutiese proses laat voortgaan, of deflekter of onttrek.

Asemhaling kan volgens Jennings (1993:16) 'n aanduiding gee van wat op emosionele vlak in die adolescent aangaan. Egalige asemhaling dui volgens Yssel (1997:80) op rustigheid, terwyl rukkerige asemhaling op spanning kan dui. Postuur is 'n ander aanwyser. Die adolescent se liggaamshouding en –taal moet dopgehou word om te sien hoe die adolescent homself handhaaf. (Vergelyk Oaklander, 1993:123.)

Om hierdie gevoelens waarvan hy bewus geword het te hanteer, is dit volgens Yssel (1999:147) noodsaaklik dat die adolescent sy gevoelens erken, aanvaar, besit en ervaar. Die belangrikheid dat die adolescent sy emosies erken en ervaar, word soos volg deur Oaklander (1988:123) uitgedruk: *"It is only when we acknowledge our feelings and experience them that we can release them and use our total organism for other things."* Dit blyk dus dat indien die adolescent onverwerkte gevoelens het, energie tot so 'n mate daardeur gebruik word dat hy nie genoeg energie oorhou om die res van sy gevoelens bevredigend te hanteer nie.

Dit is ook Landreth (1991:83) se mening dat gevoelens hul intensiteit verloor sodra die adolescent sy gevoelens openlik kan uitdruk en aanvaar. Sodoende kan die adolescent sy gevoelens meer toepaslik beheer. Indien die adolescent leer om sy gevoelens op 'n verantwoordelike wyse te beheer, word hy nie langer deur sy gevoelens beheer nie. Die adolescent ervaar dan 'n vrymakingsproses, en 'n gevoel van beheer oor sy emosies en lewe. Energie raak dan los wat weer op ander wyses aangewend kan word.

### 5.7.5 DIE ADOLESSENT DEFLEKTEER OF ONTTREK

Wanneer die adolescent met sterk emosies of moeilike aangeleenthede deel, mag dit gebeur dat hy deflekter (vermy) van die hantering van die pyn, of in stilte onttrek. In die alledaagse bestaan, kan hierdie gedrag die adolescent help om moeilike aangeleenthede te hanteer, maar sulke vermydende gedrag sal die terapeutiese proses onderbreek en word na verwys as weerstand. Wanneer weerstand voorkom, moet die terapeut versigtig wees om nie druk op die adolescent te plaas om met die storie voort te gaan nie, maar eerder die adolescent help om met die weerstand te deel op 'n wyse wat vir die adolescent aanvaarbaar is.

### 5.7.6 WEERSTAND

Perls noem dit die 'impasse laag'. (Vergelyk Frankel, 1984:51.) Weerstand word as normaal en noodsaaklik beskou gedurende die gestaltpelterapieproses. Dit kan gesien word as die vertoon van energie en is ook 'n aanduiding van die vlak van kontak van die kind. (Vergelyk Blom, 2006:59; Oaklander, 1988:196.) Schoeman (1996:32) is van mening dat die kind weerstand moet bied anders word alle nuwe inligting bloot ingeneem sonder om dit te 'verteer'. Die weerstandsproses word gesien as weerstand tot nuwe inligting en het nijs met die persoonlike verhouding te doen nie. Hierdie weerstand is nodig vir goeie integrasie van inligting sonder samevloeiing. (Vergelyk paragraaf 2.5.7.) Frankel (1984:51) is van mening dat daar twee soorte weerstand naamlik weerstand teen bewustheid en

weerstand teen verandering is. Weerstand is dus 'n belangrike gestalthanterings-meganisme. Weerstand word beskou as 'n gesonde respons aangesien kinders wat nie 'n mate van weerstand toon nie het oor die algemeen 'n swak sin vir self. Die terapeut moet dus 'n mate van weerstand verwag en dit respekteer (Blom, 2006:59). Te hoë vlakke van weerstand kan egter 'n negatiewe impak hê op die kontakmaking tussen die terapeut en die kind, maar sodra die kind veiliger voel, is hy gereed om daardeur te beweeg totdat hy weer in kontak kom met aspekte in sy lewe, die energie het tot selfondersteuning, en dan kan weerstand weer voorkom. Weerstand kan dus herhaaldelik voorkom gedurende die terapeutiese proses. (Vergelyk Blom, 2006:59; Geldard & Geldard, 1999:71; Oaklander, 1988:196.)

Yontef (1993:148) sien weerstand as die selfkonflik van die kliënt. Impasse vind plaas wanneer eksterne ondersteuning ontbreek en die adolescent glo dat hy nie homself kan ondersteun nie. Die maklikste manier om dit te hanteer, volgens Yontef (1993:150) is deur manipulasie. Die doel van die terapeut is dus om die adolescent tot gesonde selfregulering te begelei deur gesonde kontak en betrokkenheid by probleemoplossing. Geldard en Geldard (1999:72) is van mening dat die terapeut weerstand moet identifiseer en die kind terugvoer moet gee daaroor. Hulle stel dit so: "*If a child meets a block we need to help the child to deal with the block rather than to try to ignore the resistance and to push on. In order to help the child to deal with the resistance we need to raise the child's awareness of the resistance.*" (Vergelyk Geldard & Geldard, 1999:72.) Oaklander (1988:194) is van mening dat weerstand nie beveg moet word nie, maar dat daar eerder stadig en versigtig beweeg moet word, onder andere deur verandering van speltegnieke en aktiwiteite. Sodra die adolescent gereed is, sal hy oop maak. Sy stel dit so: "*In every wall of resistance there is a new door that opens into new areas of growth.*"

Navorser is soos Joubert (1997:155-157) van mening dat weerstand gebruik kan word om die adolescent se sin vir self te verbeter. (Vergelyk paragraaf 6.3.3.)

### **5.7.7 DIE ADOLESCENT GAAN VOORT OM SY STORIE TE VERTEL EN KOM IN KONTAK MET STERK EMOSIES**

Indien weerstand suksesvol oorkom is en die adolescent voortgaan om sy storie te vertel, is die moontlikheid groot dat hy voor sterk emosies te staan sal kom. Indien hy dit ervaar, besit en hanteer beweeg hy weer in die spiraal om nuwe onvoltooidhede aan te spreek.

### **5.7.8 DIE ADOLESSENT HANTEER SELF-VERNIEΤIGENDE OORTUIGINGS**

Indien die adolescent sterke emosies ervaar wat met sy storie geassosieer word, en toepaslike tegnieke word aangewend, stel dit hom in staat om self-vernietigende oortuigings met meer aanvaarbare oortuigings te vervang.

### **5.7.9 DIE ADOLESSENT OORWEEG VERSKEIE KEUSES**

In die terapeutiese situasie word keuses aan die adolescent voorgehou ten opsigte van die hantering van die situasie of die bevrediging van voorgrondbehoeftes.

### **5.7.10 DIE ADOLESSENT EKSPERIMENTEER MET NUWE GEDRAG**

Die adolescent reageer nou op die keuses en eksperimenteer met verskillende opsigte.

### **5.7.11 DIE ADOLESSENT BELEEF AANGEPASTE FUNKSIONERING**

As gevolg van nuwe aangepaste gedrag het die adolescent nou die spiraal voltooi en beweeg aan deur nuwe voorgrondbehoeftes aan te spreek in die proses van homeostase.

### **5.7.12 HANTERING VAN DIE INVLOED VAN SPESIFIKE LEERHINDERNISSE OP DIE ADOLESSENTE LEERDER AS HOLISTIESE WESE**

In die proses om die adolescent tot homeostase te begelei, moet hy as holistiese wese gesien word. Dit beteken dat alle aspekte van die adolescent se ontwikkeling in aggeneem moet word. Sekere ontwikkelingstake moet op persoonlike, sosiale en akademiese gebied uitgevoer word om gesonde volwassewording moontlik te maak. Waar spesifieke leerhindernisse die bereiking van spesifieke ontwikkelingstake strem, moet die onvoltooidheid wat na vore tree tydens die intervensieprogram, hanteer word.

Drie spesifieke aspekte van ontwikkeling waaraan daar in die spelterapieprogram aandag gegee moet word, is die verbetering van die adolescent se selfbeeld, sosiale interaksie en akademiese motivering.

Navorsers wat intrinsieke versus ekstrinsieke motivering in adolesente met spesifieke leerhindernisse ondersoek, het bevind dat hierdie adolesente meer afhanklik is van eksterne versterking en motivering as gevolg van vroeëre mislukkings (Guerney, 1983:241).

Wat die versterking van die adolescent se selfbeeld betref, is dit volgens navorsers noodsaaklik om die adolescent se siening van sy eie vermoëns en leerhindernisse te bepaal en sy bewustheid op hierdievlak te verhoog. Die gevoelens wat die adolescent hieroor ervaar, moet erken word sodat die adolescent gehelp kan word om 'n realistiese

selfbeeld te vorm deur nie net op sy beperkings nie, maar ook op sy positiewe, sterkpunte en vermoëns te fokus.

'n Volgende area van ontwikkeling wat geraak word en tydens spelterapie aandag moet kry, is die versterking van die adolescent se gesonde sosiale interaksie. Die adolescent word gehelp om struikelblokke wat deur die leerhindernisse geskep word, te identifiseer en aan 'n realistiese, verantwoordelike oplossing te werk.

Laastens moet aandag aan die invloed van leerhindernisse op die adolescent se akademiese motivering gegee word.

Bryan en Pearl (in Guerney, 1983:241) is van mening dat die remediëring van akademiese materiaal alleen nie genoeg is om die verslae houding en swak selfbeeld te oorkom nie: *"It appears that simply providing special education services will not offset the low teacher/mother (and child) expectations for learning disabled children."*

Wanneer daar met adolescente gewerk word, is daar volgens Rubin (1978:251) verskeie kernaspekte wat aandag moet geniet. Dit is onder andere afhanklikheid/onafhanklikheid, outonomie en beheer, privaatheid, toekoms en beroepskeuse, vaslegging van geslagsrol, oriëntering, identiteit, selfbewustheid, selfdefinieëring en selfbeeld.

## 5.8 SAMEVATTING

Die adolescent word binne die gestaltbenadering gehelp om die negatiewe impak wat spesifieke leerhindernisse op sy optimale ontwikkeling en funksionering kan hê, te beperk. Die adolescent kan deur spelterapie gehelp word om hierdie invloede en emosies te identifiseer, te hanteer en hy kan bemagtig word om die eise en uitdagings in sy alledaagse lewe te bemeester.

Die spelterapieprogram wat vir hierdie studie ontwikkel is, benut die gestaltbegrippe holisme, homeostase, bewustheid, beheer en verantwoordelikeheid om sy doelstelling te bereik. Die doel van hierdie interventionsprogram is om die adolescent met spesifieke leerhindernisse in sy holistiese ontwikkeling te ondersteun en hom te help om die negatiewe invloed tot die minimum te beperk en beheer daaroor te neem.

Deur die benutting van verskeie mediums en tegnieke word die adolescent in staat gestel om op 'n veilige manier sy voorgrondbehoefte te projekteer. Hy kry geleentheid om deur sowel skeppende spel as gedramatiseerde spel 'n situasie uit te beeld, verhoogde

bewustheid daarvan te bereik en tot die besef te kom dat dit sy eie behoeftes en probleme konkreet voorstel.

Verdere terapeutiese intervensie wat na projeksie benut word om die adolescent te help om sy geprojekteerde voorgrondbehoefte te hanteer en 'n oplossing vir die vervulling daarvan te vind, kan in verskeie stappe verdeel word.

Die adolescent word eerstens begelei om bewustheid van sy emosies te bereik, dit uit te druk en te hanteer. Hierna word die realiteit van die probleem aangespreek deur die adolescent te help om die realiteit van die situasie te aanvaar, beheer daaroor te neem deur keuses te maak, en sy verantwoordelikheid om hierdie keuses deur te voer, te versterk. Daar word aan die adolescent geleentheid gebied om met hierdie nuwe gedrag te eksperimenteer en indien ontoepaslike gedrag hierna voortduur, word die adolescent daarmee gekonfronteer.

Laastens word op selfvertroeteling en bemagtiging gefokus, waar die adolescent begelei word om in homself sterk genoeg te word om tot verantwoordelike behoeftebevrediging en selfsteun oor te gaan. Dit is belangrik om te onthou dat die adolescent se self gebou moet word sodat hy hierdie strategieë en hulpbronne kan benut. Nadat die adolescent bemagtig is, kan terminering plaasvind.

Die adolescent se interne proses soos wat terapie vorder en spesifieke hantering van die proses van die adolesente leerder met spesifieke leerhindernisse is ten slotte bespreek. In die volgende hoofstuk word die intervensieprogram wat tydens hierdie studie ontwikkel is vir die adolesente leerder met spesifieke leerhindernisse, volledig weergegee.